

XTIIDZ NDZON DIOS MIÑE PQUIAA JUAN

¹⁻² Jesús, meñ ne nac Diidz Ndzon, nole me zeene biala grëtaa ncuane no; lo Dios no me ni Diosaque nac me. Notaque me, tibaque nac me: me ni Dios.

³ Me bzaa grëtaa ncuane no, tsod ncuane lega scase niaan; sac me bzaaw grësew.

⁴ Ladznia me no guielmban ne gdzind dze lozh, nac guielmban co zig tib biini ne rziini lo miech.

⁵ Me nac biini ne quiazini zaatne nac lo guielcow, ni rrieeod guielcow ctsew lo biini co.

⁶⁻⁷ Bio tib mgui brielë Juan, Dios pxeel Juan biadnee Juan lo miech cho nac Jesús, zeena grëse zho gliladz Jesús.

⁸ Led Juand nac biini, sinque loxaque biaad Juan biaadlu Juan Jesús, meñ ne nac biini co.

⁹ Bdzin dzew laa Jesús biaad, ni niina me nac meñ ne noziini lo grëse miech, sac mepaa nac biini co.

¹⁰ Jesús nac biini, me nac Diidz Ndzon co. Me bzaa guidzliu, per zeene biaad me lo guidzliu ib biend miech cho nac me.

¹¹ Per ni menladz me, niicle ne lopaa zho bdzin me ib gonzed zho me; tib chop zha ne blëzlo me.

¹² Ni grë zha ne sca bleynie me, grë zha ne dib zdoo gliladz cho nac me, grëse zha co laa me bzo zho gac zho xpëed Dios.

¹³ ¡Grëse zho, rrieequia gol zho stib! Per guiabd ne togo gol zho zigne ral grë miech guidzliu rii, sinque laa zho gol zigne racladz Dios; gane niina xpëed me nac zho.

¹⁴ Zeene bdzin dze ne laa men ne nac Diidz Ndzon gā goc miech biaad me lo guidzliu, grop lo no bdzion no me, ni bzianie no me. Blu me pa lotaa nquialadz me miech, ni niapse diidzli bnee me. Bdzion no xquielndzon me ne nac me tibpaa mëed lo Dios, men ne nac Pxoze.

¹⁵ Zeene bzeet Juan Bautist me lo miech, tib vuelt haxta blu Juan me lo zho, rëb Juan: “Lëe men rii ga gon rzet naa lo to zeene rne naa: Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.”

¹⁶ Nquialadzdox Jesús ne, grëse ne gzataa dze laa ne nogaa grëtaa guielnzaac ne rsiaab me.

¹⁷ Zeene psan Moisés ley, loxaque bnabeya ne; sangue niina ne laa Jesús biaad, laa me biaadnie mine nacpaa diidzli ni biaadlu me ganle pa lotaa nquialadz Dios miech.

¹⁸ Wlaltaa ib choot gard gan Dios; sangue niina ne laa Xpëed me Jesús biaad, men co biaadlu ganle zha nac Dios; sac zaatne no Dios gague no me.

Rnee Juan Bautist cho nac Jesús

(Mt. 3:11-12; Mr. 1:7-8; Lc. 3:15-17)

¹⁹ Tib dze pxeel grë zha ne nac zha non Jerusalén, bla zha ne nac pxoze ni zla zha ne rquianap yadoo, zienabdiidz zho lo Juan dien cho nac Juan.

Bdzin zho bnabdiidz zho lo Juan.

²⁰ Dzigo bneeli Juan lo zho, rëb Juan:

—Golḡacnanḡ ganle, led naad nac Menḡ ne quiambéz to ga cxeelḡ Dios.

²¹ —¿Chox nac luu waa? —rëb zho—. ¿Te luu ye nac Lí, menḡ ne biadteed xtiidz Dios padzeela?

Pquiab Juan rëb Juan:

—Lëda, led Líd naa.

Biire zho bñabdiidz zho, rëb zho:

—¿Te luu ye nac menḡ ne bzeet Dios padzeela cxeelḡ me guiadteed xtiidz me?

Pquiab Juan rëb Juan:

—Zhaa menḡ co, led naad nac menḡ co.

²² —¿Cho dzigo nac luu? —rëb zho—. Bnë dienḡ cho nac luu; sac goḡ ib none gdziḡnie no tib xtiidz luu lo zha ne pxeelḡ no.

²³ Dzigo pquiab Juan, rëb Juan lo zho:

—Naa nac mgui ne bzeet Isá, menḡ ne biadteed xtiidz Dios padzeela, zeene znu bnee me: “Zon to zëeb tsi tib mgui dan rnee me lo miech: ¡Golḡunḡ nguudz zdoo to, sac goḡ ile ziaad menḡ ne rnabey ne!”

²⁴ Horco laa zha ne pxeelḡ zha farisé pquiab, rëb zho lo Juan:

²⁵ —Telḡne led luud nac Menḡ ne zëëble diidz ga cxeelḡ Dios, niicle led luud nac Lí, niicle nacdḡaa luu cho stib zha ne pxeelḡ Dios ziadteed xtiidz me, ¿zha nac dzigo ne nochoobnis luu miech?

²⁶ Pquiab Juan rëb Juan:

—Telḡ naa niab nis rchoobnis naa miech, per no tib menḡ ne gard ḡunbey to.

²⁷ Tib menḡ non nac me, per ni par ḡac naa tib ḡunḡdziin win ne glit lab me ni me ḡagualḡd naa; ni merle csilo ḡunḡ me dziin ne pxeelḡ Dios me ḡunḡ me.

²⁸ Betain lë tib guiedz ne riaan̄ gax ro guiubee Jordán, nëz ne rlan ngbidz; ga no Juan nochoobnis me miech zeene scataa pquiep zho me.

¿Cho nac Jesús?

²⁹ Biet stib dzew, laa Jesús bdziñ zaatne no Juan ga. Zeene gon̄ Juan me, rëbchaa Juan lo grë miech ne ndxie ga:

—¡Golwi gan̄le, lëë meñ qui gon̄ csilaa miech lo grëtaa xtol̄ zho! ¡Me gac zig tib carner yeen̄ ne guet tsogon lo Dios par guiaan̄mbe miech lo dol̄!

³⁰ Lëë meñ rii ga nagon̄ rzet naa lo to zeene rne naa: “Iraa ziaad tib meñ ne mazdraa non lo naa, sac notaque me; nole me zeene blanso naa lo guidzliu.”

³¹ Len̄ dze co niicle naa runbeyd naa me; per laa naa nochoobnis miech sac ible laa naa zial̄ par glu naa me lo grë zha Israel.

³² Dzigo bzodiidz Juan lo zho, zha gon̄lo Juan biet Espíritu Sant gbaa, rlu me zigne rlu tib palom blëz me guic Jesús.

³³ —Ne nligaa runbeyd naa me —rëb Juan—. Per zeene pxeel̄ Dios naa zial̄chobnis naa miech, hor co në me lo naa: “Zeene gan̄ luu quiet Espíritu Sant gbaa cuëz me guic tib mgui ne nochoobnis luu, dzigo gocnañ lëë meñ co nac meñ ne rxeel̄ Espíritu Sant zdoo miech.”

³⁴ Gon̄lo naa blëz Espíritu Sant guic me; gane nañween naa ne nli Xpëed Dios nac me.

Zha ne glopaa goc xpëëdsuel Jesús

³⁵ Biini liu co, laa Juan zoque ga zonie me chop xpëëdsuel me.

³⁶ Ga zo me, gon me laa Jesús zieded ga; dzigo rëbchaa me lo zho:

—¡Golwi ganle! ¡Lëë men qui gon nac Xcarner yeen Dios!

³⁷ Zigne bin zhow, laa zho zienal zhits Jesús.

³⁸ Zeene ptsire lo me, gon me laa zho nalle zhits me; dzigo rëbchaa me lo zho:

—¿Pe nac ziaadnal to zhits naa?

—Maestro —rëb zho—, laa no racladz gacndion no dien pa rbëz luu.

³⁹ Dzigo rëbchaa me lo zho:

—Na ganle guio ne, zeena gan to paw.

Nacne güeynal zho zhits me, gon zho pa lo no me; dzigo blëz zho lo me ga. Ga blozh ptse zho dze, sac ziedzele dze zie zho.

⁴⁰ Ndrés lë tib zha ne güeynal zhits me ga; lëë Ndrés co nac bets Simón Pedr.

⁴¹ Dzigo zigne brieë Ndrés ga güey Ndrés güeyguib Ndrés Simón. Bdzin Ndrés rëb Ndrés lo Simón:

—¡Nasi gon laa no bdzion Men ne nacle diidz ga cxeel Dios!

⁴² Dzigo güeynie Ndrés Simón zaatne no Jesús ga. Zeene gon Jesús Simón, rëbchaa me lo Simón:

—Bina ganle, nli Simón nac lë luu ni xingan Jonás nac luu, sangue niina laa luu grieelë Cef.

(Cef rnee zha Israel quie, laa xtiidz zha Gres rnee zhow Pedr.)

⁴³ Biet stib dze co, laa Jesús no nëz tsie me nëz Galilé. Laa me zieriee dze ga, zeene bdzieel me tib mgui lë Lip; dzigo rëbchaa me lo Lip:

—Dënal zhits naa.

44 Zha Betsaid nac Lip, ni zha coque nac Ndrés grop Simón.

45 Dzigo güey Lip güeyguib Lip Natanael; rëb Lip lo Natanael:

—¡Laa no bdzion Meñ ne nacle diidz ga cxeel Dios! Meñ ne rzeet Moisés lo libr ley ne psan me, meñ ne scataa bzeet grë zha ne biadteed xtiidz Dios padzeela. ¡Laa no bdzion me, tib meñ Nazareta, lëë me ga nac Jesús, xingan José!

46 Pquiab Natanael, rëb Natanael:

—¿Nazaret ye? ¡Gard greequia tib zha non Nazaret!

—Gotsaa guio ne ganle —rëb Lip—, zeena ganzhal luu me.

Dzigo laa zho zie.

47 Squi ziaad Natanael, zeene gon Jesús Natanael rëbchaa me:

—¡Golwi ganle, lëë zha qui gon nac merpaa zha Israel, sac mesi ib rquidied me!

48 —¿Zha nacne runbey luu naa? —rëb Natanael.

Pquiab me rëb me:

—Glole naa beenbey luu, dzigoraabredz Lip luu. Zeene zob luu tib zhan yag guigw, hor co gon naa luu.

49 Rzee zdoos Natanael, rëb me lo Jesús:

—¡Nlique nagon luu nac Xpëed Dios! ¡Luu nac zhirey zha Israel!

50 Dzigo rëbchaa Jesús lo Natanael:

—¿Pe ne binse luu ni naa gon naa zeene zob luu tib zhan yag guigw, pe mincose laa luu bliladz cho nac naa? ¡Naraa ganle gan luu ncuaane mazdraa nroob!

51 Ni rëb me lo grë zha ne ndxie ga:

—Gneli naa lo to: zanaque to ganle zeene laa zhan gbaa gzhal, zlupaa grë xanjl Dios, zha ne ziad-zëeb zha ne ziequia, quiayun zho dziin lo naa, nac naa Mgui ne pxeel me.

2

Güey Jesús tib lo guieltsieel

¹ Goc tson ngbidza, bio tib guieltsieel guiedz Caná, xtan zha Galilé ga. Dzigo bredz zho xniaa Jesús lo lni co,

² ni bredz zho me; nacne bional no zhits me grëse no ne nac no xpëedscuel me.

³ Laa lni noyac, tibaque zeene laa vin blozh. Dzigo güey xniaa Jesús rëb me lo Jesús:

—Laa xvin men rii blozh. ¡Guiendraa pe quiiz zho!

⁴ Pquiab Jesús rëb me:

—¿Pe nacne rnee luuw lo naa? Gon ganle naraa gdziñ dze ne gacnañ miech cho nac naa.

⁵ Niicle sca rëb Jesús lo me, güey me lo zha ne quiaguiiz vin ga rëb me lo zho:

—Mïne gnabeytaa me to, golguna.

⁶ Lidz men co ga ndxie xoop guies ne niaa quie; zaatne rio nis ne rquiin zha Israel riar nia zho, zigne nac grë xcostumbr zho. Tib tib guies co, rio maase xoopga re nis lena.

⁷ Dzigo bnabey Jesús zha ne rguiiz vin ga pcodzëe zho nis len gza guies co.

⁸ Blozhse guiel guiel pcodzëe zhow, rëbchaa me lo zho:

—Golcuee niip nis qui, goltsieniew lo men ne zo lo lni.

Zeene laa zho blee niip nis co tsienie zho, laaw nacle vin.

⁹ Ni lalnu ib güeynied guic men co pa brieewin co (loxaque zha ne nacse nguñdziin ga, zha ne blee nis ga, zha cose gon pa brieew), zeene pquiaaro mew, bredz me mguí ne notsieelnia ga, rëb me:

¹⁰ —¡Zha nan luu naraa cuee luu vin rii! Grëtaa zaatne znu rac lni, glo rgaaz vin niazh, zeene nrooblew noye zho, dzigo rgaaz vin ligase. Laa luu gon lel naraa bnabey luu brieewin niazh.

¹¹ Milagr ne been Jesús guiedz Caná ga, ga glopaa blu me lo miech ganle nli tib men nroob nac me. Grëse no ne nac no xpëëdscuel me, zeene bdziñ now, hor co bliladz no nli me nac Men ne zëëble diidz ga cxeel Dios.

¹² Zeene blozh guieltsieel co, laa no wbire guiedz Capernaum stib grë no me, xniala me, ni zha bets me ne. Bdziñ no Capernaum, ga bliaaz no blalaa ngbidz.

*Blee Jesús grë zha ne noyñ lgui leñ yadoo
(Mt. 21:12-13; Mr. 11:15-18; Lc. 19:45-46)*

¹³ Leñ dze ne ziaadyob lni Pascw, lni nroob ne run zha Israel rsoladz zho zha psilaa Dios zho Egipt, leñ dze co brieewin Jesús zie me nëz Jerusalén.

¹⁴ Bdziñ me Jerusalén, güey me leñ yadoo nroob ne zob lad guiedz co. Zeene bzëëb me, gon me nzian miech ne ndxie ro yadoo co, zha ne no wto ngon, zha ne no wto mëcwxiil, zha ne no wto palom ne, haxta zha ne rtsëë dimi ndxie ga.

¹⁵ Dzigo bzhixcuua me tib lë doo zig riaa dooguid ne rcaa ma, bzhen me doo co bençxoon me zho ga grë xma zho; blozh ga, ptiixche me

xmezh zha ne notsëe dimi ga, nözrii nözrec blaal me xtimi zho.

16 —¡Niinagazh golcuae grë ncuaan qui nu! —rëb me lo zha ne rto palom—. ¡Golguien ganle lidz Pxoz naa nu! ¡Nacda yu lgui parne tso to wto nu!

17 Dzigo psoladz no zha ziaad lo Xtiidz Dios, zaatne rnee: “Rbiñladz guic naa, sac ne nligaa racladz naa yquiaanap naa lidz luu.”

18 Blalaa zha non lo menquiedz Israel, zeene gon zho sca benxoon me grë miech co, wbig zho lo me rëb zho:

—¿Cho nac luu ne squitaa noyun luu grë ncuaan qui? ¡Been tib milagr, dzigo zliladz no men rnabey nac luu!

19 —Telne racladz to milagr —rëb me—; goltsil yadoo rii, ni gni naa lo to ganle ngbidz tsona laa naa bzaalolew stib.

20 Pquiab zho rëb zho:

—¡Ncuaane gliladzdraa no rnee luu! ¡Len choopxoopraa iz name biala yadoo rii! ¿Zhazhe gun luu, tsonaque ngbidz gzaa luuw stib?

21 Per zeene sca bnee Jesús lo zho, xcuerp me ga nac yadoo ne bzeet me.

22 Gane zeene brieaban me, hor co psoladz no zeene znu bnee me, dzigo bien no ne me ga bzeet me ni bien no ne me ga raquiet lo Xtiidz Dios zaatne scaque rnee.

23 Len dze lni Pascw co, nzian miech zeene gon zho grëtaa milagr ne run me, bliladz zho ne nli me nac Men ne zëëble diidz ga cxeel Dios.

24 Per ib pxend me lo zho, sacne nanwen me zha nac zho tib tib zho.

²⁵ Pquiind me chopaa niab lo me zha nac zho; sac nanwen me zha nac tib tib miech ni nan me pe rza zdoos zho.

3

Jesús ni Nicodem

¹ Ziecowle liuw, bdziñ tib zha farisé læ Nicodem zaatne rbëz Jesús; tib zha non nac me lo men_guiedz Israel. Bdziñ me rëb me lo Jesús:

² —Maestro, ndion no ible Dios pxeel luu ziadseed luu no. Grë milagr nroob ne ruñ luu, ga rlu ne Dios nacie luu.

³ —Gneli naa lo luu ganle Nicodem —rëb Jesús—, grëse miech, telne gald zho stib grieelod gdziñ zho zaatne rnabey Dios.

⁴ Pquiab Nicodem, rëb Nicodem:

—¿Gal zho stib ye? ¿Zha grieelo gal miech stib? Tib zha ne nacle men_gol, ¿niacxe zrieelo sëëb zho zdoos xniaa zho gbiire gal zho?

⁵ Rëbchaa Jesús:

—Ible none gal miech, none gal zho zigne racladz Dios. Sac telne chobnisd zho ni ygaad zho Espíritu Sant, grieelod sëëb zho zaatne rnabey Dios.

⁶ Grëse miech zeene ral zho glo, miechse nac zho; sangue zeene ral zho stib, Espíritu Santle nac men ne rnabey zho.

⁷ Gacxe waa, gzeed zdoos luu znu rne naa: “Grëse miech, ib none gal zho stib.”

⁸ Nac cuent rii zig nac me ne rtop xcow, zeene rriee me, nëzrii nëz rec zie me, ron luu razh zhoob me; per rand luu dien pa nëz zie me dien pa nëz ziaadgaa me. Scaque nagon nac zha ne ral stib,

grieelod guien miech zha rnabey Espíritu Sant lo xquielmban zho.

⁹ —Riend naa zha rnee luu —reb Nicodem—. ¡Riend naa dien zha grieelo gac gre mine rnee luu i!

¹⁰ Rebchaa Jesús:

—¿Riend luu ye zha rne naa? ¡Men rseed miech name nac luu lo menguiedz Israel!

¹¹ Mine rne naa nu ncuaane rien naaw, ncuaane gon naaw, ni riende to zha naca.

¹² Telne riend luu zha nac gre mine rne naa nu zeene rzet naa ncuaane rac lo guidzliu, ¿zha dzigo guien luu mine gne naa telne gzet naa gre ncuaane rac gbaa?

¹³ 'Wlaltaa gard tso tib zha ne soquia gbaa, per no tib men ne biet gbaa, men cosi soquia me gbaa, sac ga nac zaatne no me; ni leë men co nu nac naa.

¹⁴ Ni zigne pquiangaa Moisés tib mel brons tib guic yag zeene nonie me zha Israel dan zit co; scaque none yquiangaa naa tib lo yag,

¹⁵ zeena grese miech, zha ne gbig dib zdoo zho gnalo zho naa, zgaa zho tib guielmban ne gdzind dze lozh.

¹⁶ Sac gon rleyniedox Dios grese miech ne ndxie lo guidzliu; gane nicle tib naa nac meëd lo me per laa me pxel naa lo guidzliu; zeena grese zha ne gnalo naa, zgaa zho tib guielmban ne gdzind dze lozh; led yed zho nitlo.

¹⁷ Laa Dios pxel naa lo guidzliu par csilaa naa miech lo dol, ziald naa par gdziibdol naa miech.

¹⁸ Sac grese zha ne dib zdoo gnalo naa ne naa csilaa zho lo dol, nitlod zho. Sangue zha ne gnalod

naa, laa zho bnitlole ga, sac gon Xpëed Dios nac naa ni bliladzd zho naa.

¹⁹ Laa zho bnitlole, sac gon biaadpaa biini lo guidzliu ni laa ne nleynie zho biini, lel guielcow bleynie zho, sac guielntseeb nac miñe zienal zho.

²⁰ Grëse zha ne run guielntseeb, rlëë zho ran zho biini. Ib rbigd zho lo biini, sac racladzd zho xoobnen grë guielntseeb ne quiayun zho.

²¹ Sangue zha ne run miñe rnabey Dios, haxta rley zho rbig zho lo biini, zeena glu ganle zienal zho miñe rnabey me.

Rzeet Juan Bautist Jesús stib

²² Ga brieet Jesús güeynie me no nëz xtan zha Judé. Xtselaa bliaaz no ga grë no me, rchoobnis me grë miech co.

²³⁻²⁴ Len dze co gard guiab Juan Bautist ladzguib; dzigo ye me nochoobnis miech zaatne lë Enón gax Salim; sac ga no naal nis. Nzian miech ne rdziñ lo me ga, rchoobnis me zho.

²⁵ Tib dzew, wbig tib zha Israel lo zla xpëedscuel Juan, psilo zho nodildiidz zho dien cho zhiwrobnis nonraa; pe zhiwrobnis Jesús, te zhiwrobnis Juana ye.

²⁶ Blozhse bdildiidz zho, wbig xpëedscuel Juan lo Juan, rëb zho:

—Maestro, men ne gon bzodiidznie luu ro guiubee Jordán ga, men ne scataa bzeet luu lo miech, iye me laa me quiachoobnis miech niina, ni ndal miech niapse lo me zie zho, ziaatraade zho nëz rii!

²⁷ Pquiab Juan rëb Juan:

—Ib Dios rdeed diidz zha gun miech tib tib xtsiin me, gacd ne lega zhal zho gun zho pe cos.

²⁸ Mine pso Dios naa, laaw beñ naa: laa naa biallu ganle cho nac Meñ ne zëëble diidz ga cxeel Dios. Ni bneeli naa lo to ganle led naad nac men co; laa naa zial loxaque par gzet naa me lo miech zeena gunbey zho me.

²⁹ Ible lo me none gdziñ miech. Nac me niina zig tib mgui ne notsieelnia: Mgui ne notsieelnia, jled zha lëë rzobnie ndzooop ne notsieelnia zho! Ni grë zha ne ndzieeldiidz zho, rley zho ran zho laa xamigw zho notsieelnia, rley zho ron zho pe rnee xamigw zho. Scadaa nagon rzaac naa niina: rley naa ron naa grë ncuaane run me.

³⁰ Zigse zie dze, laa me gacnonraa; scagaa naa, zigse zie dze laa naa guiaanwinraa.

³¹ 'Nëz gbaa ziaad me, miñ co ne mazdraa non me lo grë miech. Tel naa tib miech guidzliuse nac naa, ni ncuaane riense tib miech lo guidzliu miñ co rne naa;

³² sangue me, niapse grë mine bin me, grë mine gon me miñ co rnee me lo miech; jni choot rliladzda!

³³ Zha ne rliladzse xtiidz me, rien zho ganle niapse diidzli rnee Dios.

³⁴ Xtiidz Dios rnee me lo miech; sac Espíritu Sant rdeed guielbiini lo me, ni Dios nac men ne pxeel me.

³⁵ Rleyniedox Dios me, nac me Xpëed Dios; gane grëtaa ncuaane no gbaa, no lo guidzliu, ladznia me psan Diosa.

³⁶ Grëse zha ne gnalo me, laa zho bgaale tib guielmban ne ib gdziñd dze lozh; sangue zha ne

gond xtiidz me, gdziṅd zho gbaa, zaatne ygaa zho guieḷmban co. ¡Grëse zha co, ible zgaa zho guieḷnëdox ne csiaab Dios!

4

Tib wnaa Samar

¹ Zeene bien Jesús laa zha farisé gocnanḷe ndalraa miech zienal zhiwseed me, ni ndalraa miech ne quiachoobnis me lo Juan

² (niicle ne led medpaa rchoobnis, sinque zha ne nac xpëëdsuel me zha co rchoobnis),

³ nacne brieë me xtan zha Judé ga, wbire me nëz xtan meṅ Galilé stib.

⁴ Par gdziṅ me Galilé, none ted me xtan meṅ Samar.

⁵ Xtan meṅ Samar zieded me, zig groḷ dzew, laa me zie gax guiedz ne lë Sicar,

⁶ dzigo güeyted me zaatne quia guiuu ne rnee zho “Zhibzie Jacob”; lo liu ne psan Jacob lo xpëëd me José padzeela. Rdzag me ziaad-zë me lo nëëg co, bdziṅ me bzob me ro guiuu co;

⁷⁻⁸ ga blëz me, laa no zio lad guiedz Sicar zioxi no ncuaane dioownie no me.

Ro guiuu co zob me bdziṅ tib wnaa Samar ziexi nis ga; dzigo rëbchaa me lo wnaa co:

—Bzhiguieḷ bzoladz niip zhis luu guie naa.

⁹ Bzee zdoo wnaa co gon me bnaab Jesús nis lo me, sac rlëëdox zha Judé ran zho zha Samar, per ni rneed zho lo zho.

—¡Ncuaane gliladzd naa! —rëb me—. ¡Ti zha Judé gnab nis lo ti zha Samar!

Dzigo rëbchaa Jesús:

¹⁰ —Tel̄ niaca miñe guien̄ luu gan̄le cho rnab nis lo luu, ni guien̄ luu zha nactaa ncuaañe rzoladz Dios lo miech, haxta znab luu nis lo naa. Ni naasi gon̄, znedz naa nis ne rdeed guiel̄mban.

¹¹ Pquiab wnaa co, rëb me:

—Per ni nzhen̄d luu name pe cuee luu nis, ¿pa dzigo tsiebee luu nis ne rdeed guiel̄mban ga? ¡Gon̄ gan̄le, guietdox bzie rii!

¹² Stiba, ¿niacxe mazdraa dzigo nac luu que px-ozgol ne Jacob, men̄ ne psan̄ bzie rii? Nu name go me nis grë xma me; niicle grë xpëed mew, nuque go zho nis.

¹³ —Grëse zha ne rie nis rii —rëb Jesús—, rbiire rnab zhis zho;

¹⁴ sangue nis ne rded naa, zha ne guiew gdzindraa dze gnab zhis zho. Sac nis ne gded naa, masaque gdziba zdo zho zig rdzib nis tib ro zhlian, ni nis co gdeed tib guiel̄mban ne gdziñ dze lozh lo zho.

¹⁵ Dzigo rëbchaa wnaa co lo Jesús:

—Bzhiguiel̄ bneedz nis co guie naa, zeeña gnab-draa zhis naa, zeeña guial̄xidraa naa nis nu.

¹⁶ —Güeygazh —rëb Jesús—, güeyxi tsieel luu, dzigo goltë grop to.

¹⁷ —Guiend̄ tsieel naa —rëb wnaa co—. Gard ctsieelnia naa.

—Nli rnee luu —rëb Jesús—;

¹⁸ sac gaay mgui ne zibannie luu, ni tib zho ptsieelniad luu, niicle mgui ne nonie luu niinaw, ptsieelniadaque luu zho. ¡Nli miñe rnee luu i!

¹⁹ Zeene bin wnaa co sca rëb Jesús, rëbchaa me:

—Zootne tib zha ne ziadnee xtiidz Dios lo miech nac luu.

20 Tel scaw, bzhiguiel bnë dien, ¿zha nacne rnee grë men Israel ne len yadoo nroob ne zobpaa Jerusalén, gapaa none tsiegan miech Dios? Sac no ne nac no men Samar, rnee no ne ib guic gui ne zob nu, ga none tsiegan miech Dios; sac grë xmenḡol no ga güeygan zho Dios.

21-24 Pquiab Jesús rëb me:

—Bina ganle, zdzin dze zeene yquiindraa ne goon guic gui riipaa, o Jerusalénpagaa tsie to tsiegan to Dios men ne nac Pxoꝝ ne. ¡Ni laa dze co ziaadgaxle! Gacdraaw ne dien pa lo tsie ne tsiegan ne Dios, sinque zha ne nlipaa racladz gleynie me, none dib zdoo zho gleynie zho me; zigne gdeedse Espíritu Sant guielbiini lo zho.

’Choot grieelod gan Dios; gacxe waa zha ne gleynie me, none gleynie zho me zigne rdeed Espíritu Sant guielbiini lo zho; ni none dib zdoo zho gleynie zho me. Ni zha ne sca gleynie me, zha co rguib me. Tel to laa to rieganse Dios ni runbeyde to me; sangue no rdziuunbey no men ne riogan no, sac gon lo xtii men Israel ziaad men ne guiaadsilaa miech lo dol.

25 —Nenda —rëb wnaa co—, per nan naa ib ziaad Men ne zëëble diidz ga cxeel Dios, men ne lë Crist; ni zeene laa me guiaad, me gnë diidzli lo no.

26 Pquiab Jesús, rëb me:

—¡Naa gon nac men co! Lëe me nu nonee lo luu.

27 Lëëtaaque hor co grëse no ne nac no xpëedscuel me laa no bdzin. Bzee zdoo no bdzion no laa me nozodiidznie wnaa co, per ni tib no bnabdiidz lo me dien pe quianabdiidz me, dien pegaa quia-zodiidznie me wnaa co.

28 Laa wnaa co, zoque xche me ga, rias me laa me zie nēz lad guiedz. Bdziñ me, rēb me lo grē miech co:

29 —¡Goltē ganle gunbey to ti men co! ¡Bzeet me grēse zha nac lo xquielmban naa! ¿Bay pe lēdle Men ne nole diidz cxeel Dios ga?

30 Horco brieē grē miech co lad guiedz, ziaad zho zaatne gon wnaa co Jesús.

31 Laa no, quia no rdeed no ncuaane gow me, per nēd me.

32 —Gowd naa —rnee me—. No stib xquielwagw naa miñe runbeyde to.

33 Dzigo rnabdiidzlsa no, rnee no:

—Bod no cho biaadnie pe dow me, lal ne bio ne lad guiedz.

34 Nēchaa me lo no:

—Lēē xquielwagw naa nac ne gun naa miñe rnabey Dios naa, ni csiaal naa dziin ne pxeel me naa zialgun naa.

35 To lēē rnee to: “Len stapraa mēē csilo gac wlaap.” ¡Per golwi lo grētaa miech qui ganle, nac zho niina zig grē guielgon ne golle gliaap!

36 Gacxe waa, ib none tsie to tsielaap to, tsietop to zho, zeena yгаа zho tib guielmban ne gdzind dze lozh. Ni zigne razh zha ne rie wlaap, scaque zguizh Dios to tsietop to zho. ¡Ti guielbley nrooba, zigtaa par zha ne rana, zigtagaa par zha ne rlaapa!

37 Ible nli diidz ne znu rnee: “Zhaa zha ne rie gon, stible zha ne rie wlaap.”

38 Zig nac niina, laa naa rxel to tsielaap to zaatne ni tib xtsiñ to psēēbde to; zhaa zha ne güey gon, na tole tsie wlaap.

³⁹ Laga laa me sca quianee lo no, laa grē menladz wnaa co no nēz ziaad zho nēz lo no ga. Nzian grē miech co, zeene bin zho rēb wnaa co bzeet Jesús grē ncuane ziyun me, bliladz zho Jesús.

⁴⁰ Laa zeene blanso zho ga, bnaab zho lo me cuēz me ladz zho zhis. Dzigo nacne blēz me lo zho chop ngbidz.

⁴¹ Nzianraa grē miech co bliladz me, zeene bin zho grē zhiwseed me.

⁴² —Nasi nagon laa no rliladz me —rnee zho lo wnaa co—, sac nozhal bdzion me, ni bdzion no grē mine rnee me. Nliw, ible me nac meñ ne ziaadsilaa grēse miech lo xtol zho.

Biac xpēēd tib zha ne quia dziin lo rey

⁴³ Zeene goc chop ngbidz co, laa no brieē ga gza no me, laa no bdzio nēz stib zio no nēz Galilé.

⁴⁴ Niicle ne bzeetle me: grēse zha ne ziadteed xtiidz Dios, ib ranzed miech zho zaatne nac ladz zho; per

⁴⁵ zeene bzēēb me grē guiedz ne ngab Galilé, wen pcaania grē miech co me. Nzian zho güey lni Pascw co Jerusalén, gon zho grētaa milagr ne been me ga.

⁴⁶ Nēz no no bdziñ no Caná, zaatne sca bzaalo me nis vin. Ga bdzieelo me tib zha Capernaum, tib zha ne rquia dziin lo rey; lēētaque len dze co rzacnē xpēēd me.

⁴⁷ Bin me laa Jesús brieē xtan meñ Judé, laa me no gdziñ Galilé. Dzigo biaad me biaddzieelo me Jesús ga, bnaab me lo Jesús tsienal Jesús zhits me Capernaum, tsiegunguiac Jesús xpēēd me; sac nzhoorac win.

⁴⁸ Dzigo rēbchaa Jesús lo me:

—¿Pe haxta gaṅ to dzigo guṅ naa milagr, dzigo-raa gliladz to naa?

⁴⁹ —Been tib guieṅnaac gotsaa guioniob ne —rëb men co—, nend znuse lozh xpëed naa.

⁵⁰ Rëbchaa Jesús:

—Bzë, tsod luu guieṅnë. ¡Laa xpëed luu biacle!

Dib zdoo men co bliladz me xtiidz Jesús, laa me bio nëz laa me zey.

⁵¹ Zhilew gdziṅ me lidz me, zeene bdzieelo me bla zha ne quia xtsiin me, rëb zho laa xpëed me biacle.

⁵² Dzigo bnaabdiidz me lo zho, maase pa hor biac win. Rëbchaa zho:

—Nieeg, zig rwe ngbidza, tibaque znuse brieë zhixlëë win.

⁵³ Dzigo psoladz me zig hor cotaque rëb Jesús lo me, laa xpëed me biacle. Dzigo dib zdoo me bliladz me Jesús, tsieel me, xpëed me, menlidz me ne, grëse zho dib zdoo zho bliladz zho Jesús.

⁵⁴ Ga goc brop milagr ne been Jesús lo zha Galilé. Miṅ co been me zeene wbire me nëz Judé.

5

Biac tib men ne gacd grial

¹ Goc palal dzew, laa stib lni nroob rac Jerusalén, dzigo nacne güey Jesús Jerusalén stib.

² Ro guiedz Jerusalén, gax zaatne quia puert ne rded mëcwxiiil, ga niaa tib pil nis rnee zho Betesd. Igo ro pil co niaa tib nsaap, rap nsaap co gaay arcw.

³ Lo nsaap co, ga ndxie nzian men rzacnë, no zho rold lo, no zho në ni, no zho ib gacd grial [grëse zho

laa zho ndxie ga quiambëz zho gni lo nis ne no len pil co,

⁴ sac nac diidz poc poc riet tib xanjl Dios riesini lo nis co, dzigo zha ne znuse sëëb lo nis co, tel pe guielguiidztaa rzac zho, riac zho].

⁵ Ga nix tib mgui, gocle galptsiipton iz rzacnë me.

⁶ Laa zeene gon Jesús me, ni bin Jesús scataale nroob dze rzacnë me, rëbchaa Jesús lo me:

—¿Pe racladz luu guiaac luu?

⁷ —Racladz naa —rëb me—, per guiend cho csëëb naa len pil qui zeene laa lo nis rni. Zeene racladz naa sëëb naa, zhaale stib zha ne glo rzëëb.

⁸ Dzigo rëbchaa Jesús lo me:

—¡Nasca zeena guche i! ¡Bzoli, bi yag ne bzhoob luu i, zeena bzë!

⁹ Zigne sca rëb Jesús, laa men co biac. Horcogazh blis me yag co, nzëni me laa me brieë ga.

Ni ne dze co nac tib dze nda lo zha Israel,

¹⁰ zeene gon zho ney me yag ne bzhoob me, rëbchaa zho lo me:

—¡Pe riend luu nda nadze! ¡Lëda i gon squi yquianlan luu ncuaan qui dze rii!

¹¹ Pquiab me rëb me:

—Men ne beenguiac naa, mezhal në lo naa, güey naaw.

¹² —¿Cho men sca në lo luu? —rëb zho.

¹³ Niicle me riendaque dien chow, sac ndaldox miech ne ndxie ga; hor co laa Jesús bzëëble lad grë miech co.

¹⁴ Haxta len yadooraa bdzieel Jesús me, dzigo rëbchaa Jesús lo me:

—Nana gon ne squi laa luu biacle, bien gunctaldraa luu xtol luu. Sac telne gond luu diidz,

nend dzigole glaan luu tib guielguidz ne mazdraa ntseeb.

¹⁵ Zeene laa me brie ga, güey me lo zha ne rnabey lo zha Israel ga, rëb me lo zho Jesús nac meñ ne beenguiac me.

¹⁶ Nacne psilo zho quiianañ zho dieñ zha gnaaz zho Jesús pe nacne runguiac me miech dze nda.

¹⁷ Blisqui zhow lo me, dzigo rëbchaa me:

—Tel Pxoza naa gzataa dze quiayun me dziin; ni mincoque nac mine quiayun naa.

¹⁸ Zeene gon zho sca rëb me, mazdraa blëe zho lo me rzac zho tebaa zha gutgazh zho me. Rlëe zho, sac zianañd me dieñ pa dze nda; mazdraa zeene rëb me Dios nac Pxoza me, sac ga rlu me ne lalga nac me con Dios.

Meñ nroob nac Xpëed Dios

¹⁹ Ni rëb me:

—Gneli naa lo to ganle: peet grieelod gun Xpëed Dios lega guicse me, sinque ncuaane ran me run Pxoza me, min co run me.

²⁰ Nquialadzdox Dios me, grëtaa dziin ne run Dios rlu Diosa lo me; gane zun me milagr nroob ne mazdraa gzee zdo to; ncuaane palalse i gon to niina ne biac meñ qui.

²¹ Sac telne gacladz me cueeban me tib mengut, zbeeban me zho, zigne rbeebanaque Pxoza me mengut.

²² Ni bzo Dios me, me gun guielwxtis,

²³ zeena grëse miech guien ganle zigne nonaque Pxoza me, scaque meñ non nac me, ni sca none gunnon zho me. Sac tel zha ne gunnond me, yele Pxoza me ga (meñ ne pxeel me) runnond zho.

Ni rëb me:

24 —Gneli naa lo to ganle: Zha ne gliladz xtidz naa, ni gliladz zho men ne pxeel naa, laa zho bgaale tib guielmban ne gdzind dze lozh. Led yedraa zho ygaa guielnedox ne ygaa grëraa miech ntseeb; sac laa zho brielee ladznia guielgut ga, bdzin zho lo guielmban co.

25 Zdzin dze zeene ye grë mengut, zon zho xtiidz Xpëed Dios; ni grëse zha ne gzoobdiaga, zban zho. iNi lëe dze co bdzin niina!

26 Sac gon, zigne rdeed Dios guielmban lo miech, scaque zrieelo gded naa guielmban lo miech.

27 Ni bzo me naa, naa gun guielwxtis, gded naa mine tsieguial tib tib miech.

28 'iGzeed zdoo to! Sac ne nligaa, zdzin dze, grëse mengut ne no len baa, laa zho grieeban

29 zeene gon zho tsi naa. Grëse zha ne ndzinli wban, hor co laa zho ygaa tib guielmban ndzon; sangue zha ne been guielntseeb, hor co laa zho guey lo guielnedox ne rieguial zho.

30 'Per grieelod gun naa guielwxtis naase, ib none gacnan PxoZ naaw. Grëse guielwxtis ne gun naa, laaw gun naa zigne gnabey PxoZ naa, laaw gun naa zigne nonguiela, sac gon gund naa mine guiaabtaa guic naa, sinque laa naa gun mine racladz PxoZ naa.

31 'Telne niaca mine naase rne cho nac naa, zrieequia zha ne guiab nlida.

32 Per na, no stib men ne rzeet naa lo miech; ni nan naa diidzli rnee me.

33 Haxta Juan Bautist, zeene pxeel to bla zha ne güeynabdiidz lo me, grëse mine rëb me lo zho ga, diidzliw.

³⁴ Laa naa rzet min rii lo to, zeena gliladz to cho nac naa, zeena sca laa to lo xtol to; sac rquiindpaa dien cho miech guidzliu rii gnee cho nac naa.

³⁵ Zeene biaad Juan, goc me zig tib biini bziini me lo to palal dze zeena gunbey to naa; ni bley to pquiaadiag to mine bnee me.

³⁶ Nli bnee me cho nac naa; per gre milagr ne run naa min co quiaxobnenraa ganle cho nac naa. Pxoza naa rneedz diidz run naaw; ni ga rlu ganle ne me pxeel naa.

³⁷ Haxta ye me mezhal quialu ganle cho nac naa, parga nli gard gan to me, niicle gard gon to tsi me.

³⁸ Ronde to pe rnee me, sac rililadzde to naa; sac gon me pxeel naa zialne naa xtiidz me.

³⁹ Nli rioxco to rseed to gre guits ne ziaad Xtiidz me, sac rien to ga ziaad dien zha yгаа to guielmban ne gdziind dze lozh. Ni niicle ne lo co zhobnee ganle cho nac naa,

⁴⁰ per neđe to gbig to lo naa, zeena yгаа to guielmban co.

⁴¹ Neđe to gunbey to naa, neđe to guien to cho nac naa, per peet nacd min co;

⁴² runbey naa to, ni lalnu rleynde to Dios.

⁴³ Sac gon, me pxeel naa zial naa lo to, ni rlee to ran to naa; mazd zha ne lega ziaadse, zha cosi leeléd rcaania to zho.

⁴⁴ iMin co gon, ib rililadzde to cho nac naa! Sac laa guic to zienie loxaque dien zha gunnon samiech to to, ib rguibde to zha gacnon to lo Dios.

⁴⁵ Ni guiabde to togo naapaa gazo to lo Pxoza naa, glisqui naa gre ncuaane run to. Moisés gon nac men ne glisquiw; sac ley ne psan me, mine rnalo

to csilaa to lo xtol to, lëew glu ganle pe nac grëtaa ncuaane quiayun to.

⁴⁶ Sac gon, telne niaca mine nlipaa riladz to grë mine pquiaa Moisés, zlladz to dzigo cho nac naa; golgan ganle, lo grë guits ne pquiaa me, ga rzeet me naa.

⁴⁷ Rlu riladzde to grë mine pquiaa Moisés ga, gane riladzde to mine rne naa lo to.

6

Row gaay mil miech

(Mt. 14:13-21; Mr. 6:30-44; Lc. 9:10-17)

¹ Bded ga, tib dzew brieé Jesús bdedquia me nëz dan ro Nisdoo Galilé (lëëque nisdoo co ga rnee zho Nisdoo Tiberias).

² Miech guizhiu ne brieenal zhits me, sac ziyan zho grëtaa milagr ne run me, runguiac me grë men rzacnë.

³⁻⁴ Nzian zho nac zha ne zie lni Pascw, lni nroob ne rac Jerusalén gzobse iz.

Grëse no ne nac no xpëedscuel me, laa no nal zhits me. Zeeñe bdieedquia no ro nis co, dzigo bdzieep no tib cho gui win zob gax ga. Loxaque laa no bzioob ga grë no me,

⁵ zeeñe bdzion no miech guizhiu ne ziaadquia cho gui co, laa zho glansole lo no ga. Dzigo rëbchaa me lo Lip:

—Lip, ¿pa guioziu ne ncuaane gow grëtaa miech qui?

⁶ Per lega scase rëb me lo Lip, par dien pe guiab Lip; sac nanle me pe nac ncuaane gun me.

7 —¡Ne nligaa pe zhidaa zho! —rëb Lip—. Niicle telne niaca mine gziuu nzian gayoo quietxtil, ni ygaad ncuaan co yгаа zho tiblë wingaw tib tib zho.

8 Dzigo pquiab Ndrés, bets Pedr, stib zha ne nacgza no; rëb Ndrés:

9 —Nu zo tib mëëdbgui win ney gaay quietxtil cebad ni schop mel win. ¿Per pa yгаа ncuaan co lo grëtaa miech qui?

10 —Golnee lo zho dien —në me lo no—. Golguiab lo zho sob zho.

Ndzon zëëb guizh nguia ga, dzigo laa grë miech guizhiu co bzob lo guizh nguia co (zig gaay mil rgaa loxaque zha bguise).

11 Dzigo bnaaz me gza quietxtil co, bdeed me xquizh lo Dios. Blozhse ga, zigse rneedz mew lo no scase scase rguiiz now lo grë miech co; scaque been me grop mel co. ¡Grëse miech co, dow zho zaatne bieltaa zho!

12 Blozhse dow zho, nëchaa me lo no:

—¡Goltsietop grëse mine biaan i, zeena nitloda!

13 Psilo no ptop no grë quietxtil ne biaan ga, zeene blozh bdopa, ¡lo gaay quietxtil cebad co, biodzë tsiipchop chicuid biow!

14 Zeene gon grë miech co milagr ro ne been Jesús ga, rneechaa zho:

—¡Ne nlipagaa, lëë men qui ga quiambiaaz ne! ¡Me nac Men ne zëëble diidz ga cxeel Dios lo guidzliu guiadteed xtiidz me!

15 Bienga Jesús racladz zho, zhoo tsienie zho me gac me zhirey zho, nacne bzoquia me guic gui win co, tipse me.

*Rzë Jesús lo nis
(Mt. 14:22-27; Mr. 6:45-52)*

16 Rguetsle liuw, bzhiuxto no dan bdziñ no ro nisdoo co; ga bliaaz no me.

17 Bdzionse no choot rlansod ni laa liu rcowraa, dzigo mazd laa no bziaab leñ canó, laa no zio nêz Capernaum.

18 Laa no zionie canó co lo nis, tibaque zeene psilo rriee me, ntseeb riasoli lo nis co.

19 Maase gaay kilómetro o xoopgaaw goc zio no, tibaque zeene bdzion no laa me ziaad-zê lo nis co, gaxle lo no ga. Zeene bdzion no sca ziaad-zê me lo nis, bdzieeb no.

20 Dzigo bnee me, nê me lo no:

—¡Gdziebde to! ¡Naa zial nu!

21 Dzigoraa rley no bdzion no laa me bzëëb leñ barcw; tibaque zeene bien no laa no brieequiale zaatne no gdziñ no ga.

22 Biini liu co, grê miech ne biaan stib nêz ro nis co, laa zho bdziñ zaatne nac ro nis ga, quiambêz zho gan zho me. Sac gon zho tibaque barcw zo ga, ni zeene wbii no ga, loxaque nose wbii.

23 Gax zaatne bguiaan me zho ga, ga bdziñ bla barcw ne ziaad nêz Tiberias;

24 dzigo gonse zho niicle me niicle no ne nac no xpëëdscuel me, choot guiend ga, nacne bzëëbaque zho leñ barcw ne bdziñ ga ziaad zho nêz Capernaum.

Jesús nac men ne rdeed guielmban

25 Zeene blanso zho Capernaum, laa Jesús zole lo no ga; dzigo rëbcha zho lo me:

—Maestro, ¿pa horzhe waa blanso luu nu?

26 Dzigo rëbcha me:

—¿Naa lëe ziaadguib to? Per ziaate to porne rien to cho nac naa, sinque laa to ziaad porne gon to bnedz naa ncuaane pquiuin to.

27 ¡Golguien, tsienied guic to loxaque ncuaane gowse to, sac znuse rnitlo grë ncuaan co! Sinque, goltsoxco golgun mine racladz Dios, zeena ygaa to tib guielmban ne ib gdzind dze lozh. Ni naa ne nac naa Mgui ne pxeel me, naa gneedz guielmban co lo to; sac ible min co pxeel me naa.

28 Dzigo bnabdiidz zho lo me, rëb zho:

—¿Zha dzigo dziuun no mine racladz Dios? ¿Pe nac ncuaane dziuun no?

29 Pquiab me rëb me:

—Mine racladz Dios gun to: gliladz to cho nac men ne pxeel me.

30 —Telne scaw —rëb zho—, none dzianlo no gun luu nzian milagr, zeena gliladz no luu. ¡Nligaa peet milagr nroob gard dzian no gun luu!

31 Tel grë pxozgol ne, zeene wban zho grë dan bidz co padzeela, gzobse dze biet tiblo quietxtil zhan gbaa, dow zho; rnee lo Xtiidz Dios: “Moisés rdeed quietxtil co lo zho.”

32 Pquiab me rëb me:

—Golgacnan ganle led Moisésd bdeed quietxtil co, sinque Pxoza naaw. Ni niina gon laa me quia-needz merpaa quietxtil gbaa lo to.

33 Sac gon, me pxeel men ne biet gbaa ziaddeed guielmban lo grë miech rii; men co nac quietxtil gbaa co.

34 —Been tib guielnzaac sca —rëb zho—, ¡gzataa dze bneedz quietxtil co dioow no!

35 Pquiab me rëb me:

—Naa gon nac guietxtil ne rdeed guielmban ga. Grëse zha ne gbig lo naa sëëb zho xnëz naa, gdziñdraa dze ne ycaabedz zho; grëse zha ne gliladz cho nac naa, gdziñdraa dze ne gnab zhis zho.

³⁶ Laa to gon, zigne bnelegaa naa lo to ga, jniicle ran to naa, per rliladzde to cho nac naa!

³⁷ Grëse zha ne rxeeł Pxoz naa, rlanso lo naa; ni tib zho ctsireed naa.

³⁸ Sac gon, laa naa bieet gbaa zialgun naa miñe racladz Pxoz naa (meñ ne pxeel naa); bieete naa par gun naa miñe gacladztaa naa.

³⁹ Ni miñe racladz me, grëse zha ne bneedz me lo naa, ni tib zho nitlod, sinque cueeban naa zho gal dze ne laa guidzliu nitlo.

⁴⁰ Sac racladz me: grëse zha ne gbig lo naa ni gliladz zho naa dib zdoo zho, grëse zho ygaa tib guielmban ne ib gdziñd dze lozh, ni cueeban naa zho gal dze ne nitlo guidzliu.

⁴¹ Dzigo psilo grë zha Israel rneenë zho me, loxaque ne rëb me, me nac guietxtil ne biet gbaa;

⁴² rnee zho:

—Meñ rii ga name rnee zho Jesús, me nac xingan José. Rdziuunbey ne xnïaa me, rdziuunbey ne pxoz me. ¿Zha nac dzigo ne rnee me gbaa biet me?

⁴³ Dzigo rëbchaa me lo zho:

—Lëëwga na, gołsioog ro to. Nodne squitaa gzee zdoo to miñ co.

⁴⁴ Laa Pxoz naa pxeel naa zial naa lo guidzliu, per ni tib miech gon grieelod gbig lo naa telne niaca miñe cuedzd me zho; ni zig rnele naa ga, zha ne gbig, naa cueeban zho gal dze ne laa guidzliu nitlo.

⁴⁵ Znu rnee lo Xtiidz Dios, zaatne pquiaa grë zha ne biadteed xtiidz me padzeela, rneew: “Laa Dios cseed grëse miech.” Ni lëë miñ co rac niina; gacxe nagon waa, grëse zha ne rquiaadiag miñe rnee Pxoz naa ni rseed zhow, grëse zha co lo naa rlanso zho.

⁴⁶ Zha ne rlanso lo naa, guiabde to togo gonlo zho me; ni tib choot gard gan me, naase nac men ne ziyan me, sac zaatne no me ga brie naa zial naa lo to.

⁴⁷ Golliladz miñe gni naa lo to nu sca: ¡Grëse zha ne dib zdoo zho gliladz zho cho nac naa, zgaa zho tib guielmban ne gdziñdraa dze lozh!

⁴⁸ Ne nligaa naa nac quietxtil ne rdeed guielmban ga.

⁴⁹ Grë pxozgol to, zeene sca bio zho grë dan bidz co, nli dow zho quietxtil ne biet gbaa ga, per bdeetew guielmban lo zho, sac grëse zho gut.

⁵⁰ Sangue quietxtil ne rne naa lo to, gbaa bieta ni grëse zha ne yquiina zgaa zho tib guielmban ne gdziñd dze lozh.

⁵¹ Xcuerp naa nac quietxtil ne biet gbaa, miñe rdeed guielmban ga; grëse zha ne gow quietxtil co, zgaa zho tib guielmban ne gdziñd dze lozh. Lëew gded naa zeena grieelo ygaa grëse miech lo guidzliu rii stib guielmban.

⁵² Psilo grë zha Israel co stib, quianeelsa zho, rnee zho:

—¿Zha nacne squi rnee men qui? ¡Zootne rnee me none dioow ne xcuerp me!

⁵³ —Gneli naa lo to ganle —rëb me—, telne gowde to xcuerp Mgui ne pxeel Dios, ni guiede to xchen me, ygaade to stib guielmban co.

⁵⁴ Saṅgue zha ne gow xcuerp naa, ni guie zho xchen naa, ib zgaa zho guieḷmban ndzon ne gdziṅd dze lozh ga, ni naa cueeban zho gaḷ dze ne laa guidzliu nitlo;

⁵⁵ sac xcuerp naa nac miṅe mazdraa rquiin gow miech, ni xchen naa nac miṅe mazdraa rquiin guie zho.

⁵⁶ Grëse zha ne row xcuerp naa, ni rie zho xchen naa, mbannie zho naa, niiclegaa naaw mbannie naa zho.

⁵⁷ Meṅ mban nac Pxoṅ naa, meṅ ne pxeel naa, me nac meṅ rneedz guieḷmban lo naa; ni scaquegaa zha ne gow xcuerp naa, naa gded guieḷmban lo zho.

⁵⁸ Naa nac guietxtil ne nlipaa biet gbaa. Grëse zha ne gow guietxtil rii, zgaa zho guieḷmban; led yed zho guet zig gut grë pxozgol to, zha ne sca dow guietxtil co.

⁵⁹ Lëe grë miṅ rii bnee Jesús zeene pseed me miech leṅ yadoo win ne zob Capernaum.

Diidz ne rdeed guieḷmban

⁶⁰ Nzian grë zha ne rzënie Jesús, zeene bin zho grë miṅe bnee me ga, rneechaa zho:

—Zha ngaṅdoxtaa nac grë diidz ne rnee me i. iCho gnë dieṅ pe bnee me!

⁶¹ Bien Jesús sca nonee zho, dzigo rëbchaa me lo zho:

—¿Pe rlëe guic to bin to miṅe rne naa ga?

⁶² ¿Pe guiabzhe to dzigo zeene gaṅ to laa Mgui ne pxeel Dios soquia gbaa, gbiire guey me zaatne no me glo?

⁶³ Espíritu Sant rneedz guieḷmban lo to, telne guieṅd espíritu peet nond xcuerp to, sac bëëlse

naca. Ni grë diidz ne bne naa lo to, lëew nac Espíritu, ni lëew gneedz tib guielmban ne gdziñd dze lozh lo to;

⁶⁴ sinque to, bii no zla to rliladzd cho nac naa.

Sca rëb me sac desde psilo bzënie zho me, rienle me cho nac zha ne ib rliladzd me, ni cho nac zha ne tsieto me.

⁶⁵ —Runbey naa to —rëb me—, gane ni naa lo to ni tib miech grieelod gbig lo naa sëeb zho xnëz naa, telne niaca mine cuedzd Pxoza naa zho.

⁶⁶ Nzian zha ne rzënie me, hor co laa zho bzozit lo me, bzëniedraa zho me.

⁶⁷ Dzigo bnee me lo no gza tsiipchop no ne nac no xpëedscuel me, në me:

—To waa, ¿pe led yede to racladz gbiche lo naa?

⁶⁸ Pquiab Simón Pedr, rëb Simón:

—¿Per cho loraa nadien guio no? Luuse nac men ne rseed miech diidz ndzon ne rdeed guielmban ne gdziñd dze lozh.

⁶⁹ Laa no bliladzle cho nac luu, laa no gocndionle ne luu nac Men Ndzon ne pxeel Dios.

⁷⁰ —Nliw —rëb me—, ni naa bzooblo to gza tsiipchop to, per na gon laa tib to bzëeble xnëz mendox.

⁷¹ Zeene sca rëb me, lëele Judas ga bzeet me (zhin Simón Iscariot); sac ye Judas nacgza no lo tsiipchop no ne bzooblo me ga, ni Judas nac zha ne güeyto me.

7

Rliladzd menlidz Jesús cho nac me

¹ Bded ga, loxaque grë guiedz ne ndxie xtan zha Galilé, gase rieted Jesús. Sac grë zha Israel ne no

x^{tan} zha Judé, zha ne rlëë lo me, racladz zho gut zho me.

² Laa zeene bdziñ dze ne run zha Israel lni ne rzhixcuaa zho grë yu guizh, ni rbëz zho lena;

³ rëbchaa zha bets me lo me:

—¿Pe nacne ib rried luu nu? Brie zho, güey dib x^{tan} zha Judé, zeena ye grë zha ne racnie luu ga gan grëtaa ncuane run luu.

⁴ Sac gon, zha ne racladz gunbeyraa miech zho, grë ncuane rac zho, run d zhow ngeets zhlian zigne run luu. Rac luu name run luu grë milagr nroob, beena zaatne gan nzian miecha.

⁵⁻⁶ Sca rnee zho lo me, sac niicle zha riladzd cho nac me; dzigo rëbchaa me:

—Griyelod ga naa niina, sac gard gdziñ dze co; zhaa nac to, zac tsie to zeene gacladztaa to.

⁷ Tel to, rlëened miech to; sangue naa rlëenie zho naa, sac rne naa lo zho pe nac grë guielntseeb ne run zho.

⁸ Goltsie, tedse lni rii dzigo ga naa; sac gard gdziñ dze ne glu cho nac naa.

⁹ Dzigo laa me biaan ga.

¹⁰ Per loxaque brie zho zie zho, yeque me brie zie me; lëeraasi ngeetsse bdziñ me.

¹¹ Grë zha Israel ne rlëë lo me, quiaguib zho me lo lni co.

—¿Bay yo men co? —rnee zho—. ¿Pe nacne ib choot gard dzian me?

¹² Grë zha ne ndxie lo lni, loxaque me rzeet zho. No zho rnee: “Tib miech wen nac me”; nogaa zho rnee: “Pe miech wen na zho gac me, loxaque noquidie me miech.”

13 Per zhliaanse rzodiidz zho rzeet zho me, sac rdzieb zho grë zha Israel ne rlëe lo me.

14 Goc chop tson ngbidz ne noyac lni, tibaque zeene laa me bzëeb len yadoo nroob ne zob lad guiedz ga, psilo me pseed me grë zha Israel ne no len yadoo ga.

15 Zeene gon zho zha rseed me, rzee zdoo zho rnee zho:

—¿Zha nac squitaa rac men qui, ni laa me pseete me grë zhiwseed yadoo?

16 Pquiab me rëb me:

—Led naad nobeebey grë mine quiaseed naa miech, sinque laa naa quiaseed zho mine rnabey men ne pxeel naa.

17 Telne yquiabladz to gon to mine rnabey me, ga guien to dien pe nli xtiidz Dios rseed naa miech, te mine riab guic naaw ye.

18 Sac grë zha ne rnee grë mine riab guicse zho, laa zho runa zeena gacnziuu zho lo miech; sangue zha ne rioxco glu ne non men ne pxeel zho, zha cosi niapse diidzli rnee zho, rund zho ne yquidie zho miech.

19 Laa Moisés psan ley lo to, per, jni tib to gon zienald mine rnabeya! ¿Pe nac dzigo racladz to gut to naa?

20 Pquiab be grë miech co, rëb zho:

—¿Mendzable i gon noguitnie guic luu! ¿Chozhe racladz gut luu?

21 Rëbcha me:

—Tib vuelt, loxaque gon to beenguiac naa tib men rzacne dze ne rdziiladz to lo dziin, na grëga to squitaa rac lo naa.

²² Ni to gon, no hor par gun to mine rnabey ley run to dziin dze co; zig nac zeene rio tib meed bey (niicle ne riote pxozgol to bey co, zeene laa ley biaan).

²³ ¡Gase na ganle golwi! Rquia to rgo to tib meed bey haxta dze ne rdziiladz to lo dziin, loxaque par quiitsde to xley Moisés. ¿Pe nac dzigo ne rlëe to lo naa loxaque ne beenguiac naa tib miech dze co?

²⁴ Golguien ganle, nonguield ne lega gdziibdol to tib miech. Goltsoxco goltsienal mine nac diidzli.

¿Cho nac Jesús?

²⁵ Blalaa men Jerusalén ndxie ga, dzigo psilo zho rnabdiidzlsa zho rnee zho:

—¿Pe led men riid ga zho scataa quiaguib zho gut zho?

²⁶ Pa zotaa me gon quianee me lo grë miech qui, ni choot peet rund me. ¿Pe goon bliladzle zhiwxtis ne naye ne me nac Men ne zëëble diidz ga guiaad lo guidzliu?

²⁷ Per gacda men qui. Tel men quiw, rdziuunbey ne me, ndion ne cho zha nac me; sangue Men ne zëëble diidz guiaad ga, zeene gal dze ne laa me guiaad, choot gacnand dien cho zha me.

²⁸ Bin Jesús sca nonee zho. Squi ndxie grë zha ne noquiaadiag zhiwseed me len yadoo ga, nguiedz bnee me rëbchaa me:

—Ah, conque runbey to naa dzigo, ¡nan to pa nëz zial naa! Per led zhaald naa gon zial naa, no tib men ne pxeel naa per runbeyde to me; men co nac men ne rnee niapse diidzli.

²⁹ Sangue naa runbey naa me, sac lo me brie naa, me pxeel naa zial naa lo to.

³⁰ Dzigo gocladz zho naaz zho me ga, per ni tib zho whigd nzhen zho me; sac gard gal dze co.

³¹ Grë zha ne ndxie ga, ndal zho bliladz me.

—Telne led med nac Crist —rnee zho—, niacxe zun me grëtaa milagr nroob ne run me. ¡Tsodraa zha ne gun grëtaa milagr ne run me!

³² Bin zha farisé nozeet grë miech co Jesús, dzigo bnediidaque zho grë zho pxoz ne rnabey, pxeel zho bla zhaguiib zie zienaaz me.

³³ Bdziñ grë zhaguiib co, rëbchaa me lo zho:

—¡Golxecw zniip! Zhile dze ne cuëz naa lo to; ib laa naa none gbiire guia naa lo men ne pxeel naa.

³⁴ Zguib to naa, per gdzieldraa to naa, ni grielod gdziñ to zaatne guia naa.

³⁵ Grë zha ne ndxie ga, zeeñe bin zho sca rëb me, rzee zdoos zho.

—¿Pa naczhe zaatne tsie me? —rnee zho—. ¿Zha nacne ib gdziel ne me? Nend grë zha ladz ne tsieseed me, grë zha ne no stib ladz beñ.

³⁶ ¿Zha nacne rnee me, zguib ne me per gdziel me lo ne, niicle grielodgaa guio ne zaatne guey me?

Nis ne rdeed guielmban

³⁷ Zeeñe gol dze ne laa lni co lozh (dze co nac dze ne mazdraa nroob), miech guizhiu ne ndxie; dzigo nguiedz bnee Jesús lo grë miech co, rëb me:

—Grëse zha ne racladz guiaanwen zdoos, rzac zho zig nac zeeñe rnab zhis zho, guiaad zho lo naa, naa gded nis ne guie zho.

³⁸ Sac grëse zha ne dib zdoos gliladz cho nac naa, rnee lo Xtiidz Dios, masaque rrieequia tib nis ndzon ne gdzib zdoos zho, pale tib guiubee nroob; nis co gdeed tib guielmban cub lo zho.

39 Sca bzeet Jesús Espíritu Sant. Ga bzeet me, grëse zha ne gliladz cho nac me zacnie Espíritu Sant zho. Gard guiaad Espíritu Sant leñ dze co, sac gard gbire Jesús lo guieḽndzon ne no me gbaa hor co.

40 Blalaa zha ne ndxie ga, zeeḽe bin zho sca bnee me, rneechaa zho:

—Ne nlipagaa, lëe meḽ qui ga no guiaad antes ne glanso Meḽ ne nacle diidz cxeelḽ Dios ga.

41 Rrieequia zla zha ne rnee:

—¡Lëda! ¡Lëëgazh me i! Meḽ qui nac Meḽ ne zëëble diidz ga cxeelḽ Dios guiaad lo guidzliu.

Rquiab zla zha ne rnee:

—Meḽ Galilé nac meḽ qui. ¿Niacxe lo xtii grë zha co grieequia Meḽ ne cxeelḽ Dios ga?

42 Pe led rnee lo Xtiidz Dios lo xtii rey David, ga grieequia me ni Belén ga gal me, zaatne gocaque ladz rey David.

43 Zhaase zhaase rnee zho; leḽ psilo zho nodildiidz zho dien cho nac me.

44 Brieequia bla zho gocladz naaz me, per ni tib zho wbigd nzheḽ zho me.

45 Grë zhaguiib ne zienaaz me ga, scase zho laa zho bdzin. Zeene goḽ grë pxoz rnabey co, grë zha farisé co choot bdziḽnied zho, rëbchaa zho:

—¿Pe nac dzigo ne ziaadniede to me?

46 Pquiab zho rëb zho:

—¡Wlaltaa gard dziaḽ no tib meḽ ne scataa ndzon rnee!

47 Rëbchaa zha farisé:

—¡Pe nlipaa rnee to! ¿Yelaque to dzigo beenḽgüet me?

48 ¿Pe rwide to, niicle zhiwxtis new, niicle now, ni tib choot rliladzd ne me nac Meñ ne zëëble diidz cxeel Dios ga?

49 Grë zha nxen ne rliladz ne nli Dios pxeel me, ¡miech ndziibdeele nac zho, sac goñ rienđ zho zha rnee lo ley!

50 Ga zob Nicodem, meñ ne güeyzodiidznie Jesús ga glo, ye me nacgza grë zha rnabey co, dzigo guso me bnee me lo zho, rëb me:

51 —Golguien ganle nonguielđa ne lega pe gnee ne. Sac goñ, zig nac xley ne, rnabeya none gacndiongazh ne zha nac xtiidz tib miech, dien pe nac mine quiayun zho, dzigora a gac guielwxtis.

52 Pquiab zho rëb zho:

—¿Zootne ye luu lëë nacgza grë zha Galilé ne rleynie me? ¡Grë zha ne cxeel Dios, ni tib zho grieequiad Galilé! ¡Luuzhal bguiba lo grë guits ne ziaad Xtiidz Dios ganle, zeena gliladz luu!

53 Blozh ga, grëse zho laa zho wbi, tib tib zho zeyse zho lidz zho.

8

Tib wnaa ro nëz

1 Ga brie e Jesús güey me zaatne rnee zho Gui Oliv.

2 Zeene biini liu co, silgaw laa me bdziñ len yadoo co stib. Nzian miech ne goclo lo me ga, nacne bzob me psilo me pseed me zho.

3 Laa me noseed grë miech co, zeene bdziñ bla maistr ley, ni zla zha farisé, bdzinne zho tib wnaa ne nole tsieel ni bgaanie me stib mgui; dzigo bzo zho wnaa co glowtaa lo grë miech ne ndxie ga.

⁴ —Maestro —rëb zho lo Jesús—, laa wnaa rii bga a nonie me stib mguì.

⁵ ¿Pe gnë luu dien zha gac me? Sac zig nac ley ne psan Moisés, rnabeya gdeedquie no grë wnaa ne squi nac, haxta guet zho.

⁶ Sca rëb zho, sac laa zho quiaguib dien zha cxin me tib diidz, zeena sca grieelo tsiezo zho me lo wxtis. Per zeene bin me sca rëb zho pquiitsrunga me liu, psilo me con mzhugnia me noquiaa me lo liu.

⁷ Rañ zho rquiabd me, wbiire zho bnabdiidz zho lo me stib; haxta blis lo me, rëb me lo zho:

—Peet nacda, goldeedquie me. ¡Lëëraasi, zha ne rien ni tib dol rapd, zha co csilo gdeedquie me!

⁸ Blozh ga biire pquiitsrun me, psilo me stib noquiaa me lo liu.

⁹ Zeene bin zho sca rëb me, mazd mine been zho laa zho brie e ga, sac bien zho miech ngoopdol nac zho. Zha ne nacpaa zha gol lo zho bner, blozh ga zo zo brie e zho grë zho; loxaque wnaa cose biaan ga.

¹⁰ Dzigo bzoli me, rëb me lo wnaa co:

—¿Yo grë zha ne scataa baaad-zo luu nu? ¿Ni tib zho lëë beenquizhd luu xtol luu?

¹¹ —Ni tib zho —rëb wnaa co.

—Niicle naa —rëb Jesús—, gunquizhd naa luu xtol luu. Bzë, per bien gbiiredraa luu gun luu grë ncuaane gunctal xtol luu.

Jesús nac zig tib biini

¹² Bded ga, tib dze nonee Jesús lo grë zha ne noquiaadiag zhiwseed me, rëb me lo zho:

—Nac naa zig nac tib biini ne rziini lo miech. Grëse zha ne gbig lo naa, led yed zho soriel ni

lo ncow, sac naa gziini lo zho zeena yгаа zho tib guielmban ndzon.

¹³ Zeene bin zha farisé sca rëb me, psilo zho nguiedz roptsie zho rnee zho:

—¡Cho gliladz xtiidz luu! ¡Lëëque luu rnee cho nac luu!

¹⁴ Pquiab me rëb me:

—Niicle ne naaque rne dien cho nac naa, per diidzli nac mine rne naa. Rien naa pa nëz zial naa, pa nëzгаа za naa; sangue to gon peet riende to,

¹⁵ gacxe waa, rcaadzdoł to naa ncuaane ni nacd naa; ncuaane rcaadzdoł to naa, niapse guic to riaba. Tel naa, zig nac niina noyund naa guielwxtis

¹⁶ per zeene gdziñ dze co, tib tib miech mine been zho miñ co glu dien pe nac mine tsieguial zho; sac Pxoз naa meñ ne nacie naa, me gnë zha guñ naa guielwxtis.

¹⁷ ¿Pe nacie rliladzde to mine rne naa? Led rnee lo xley to zeene tipse rzë xtiidz chop miech, ga rlu ne diidzli rnee zho.

¹⁸ Zig nac niina, naa nac tib zha ne rne cho nac naa, laa stib zho nac Pxoз naa meñ ne pxeel naa; sac gon ye me rnee ganle cho nac naa.

¹⁹ Pquiab zho rëb zho:

—¿Yo Pxoз luu na? ¿Pa no me?

—Runbeyde to me —rëb Jesús—, sac niicle naa runbeyde to naa. Telne niaca mine runbey to naa, runbeyle to me na.

²⁰ Gax zaatne riesañ miech gon leñ yadoo nroob ne zob lad guiedz Jerusalén, ga zob Jesús zeene sca rëb me; per choot bnaazd me, sac gard gal dze co.

Grieelod gdziñ to zaatne guia naa

²¹ Bded ga, biire Jesús rëb me:

—Laa naa guia nagon. Squiaguib to naa, per lëëque lo xtol̄ to i nitlo to, sac zaatne guia naa grieelod gdziñ to ga.

²² Grë zha Israel ne ndxie lo me ga, rneechaa zho:

—¿Pe goon̄ lëëque me naye gut me? Zha nacne squi rnee me goon̄ grieelod gdziñ ne zaatne guey me.

²³ —Tel̄ to —rëb me—, zha nëz lo guidzliu nac to; laa naa gon̄ zha nëz gbaa nac naa. Men̄ guidzliu rii nac to, sangue naa nacd naa zha guidzliu rii.

²⁴ Gane ni naa lo to lëëque lo xtol̄ to i nitlo to. Ne nligaa, tel̄ne gliladzde to ne naa nac men̄ ne nac naa, ible lëëque lo xtol̄ to nitlo to.

²⁵ —¿Cho dzigo nac luu? —rëb zho.

Rëbchaa me:

—Blactaale rne naaw lo to. Haxta zeene psilo naa xtsin̄ naa, laa naa rne lo to gan̄le cho nac naa.

²⁶ Ndal grë ncuaane zac glisqui naa lo to nu niina, ni ndal ncuaane racladz naa gne naa lo to, per laa naa noyun̄ mine rnabeyse men̄ ne pxeel̄ naa; ni men̄ co nac men̄ ne rnee diidzli.

²⁷ Per ib rien̄d zho ne Dios ga rzeet me lo zho.

²⁸ Dzigo bnee me lo zho stib, rëb me:

—Nieeda gal̄ dze ne yquiaa to naa tib lo yag, dze co gun̄bey to gan̄le ne naa nac Mgui ne pxeel̄ Dios ga, dze co guien̄ to gan̄le led guicd naa riab grë mine quiayun̄ naa; sinque mine pseed me naa, min̄ co rne naa lo to.

²⁹ Dios pxeel̄ naa ni tibaque nacie me naa, ib rsaand me naa, sac tibaque noxco naa run̄ naa mine rdziladz me.

Zha ne nac xpëed Dios

³⁰ Grē zha Israel ne ndxie ga, zeene bin zho sca rēb me, bliladz zho ne me nac meṅ ne no cxeel Dios ga.

³¹ Dzigo bnee me lo zho, rēb me:

—Telne racladz to gac to xpēēdscuel naa, zha ne nlipaa ygab xnēz naa, none guiaadnal to grēse zhiwseed naa.

³² Sac sca guṅbey to miṅe nacpaa diidzli, ni lēew glu lo to zha laa to ne squi nac to zig tib nguṅdziin.

³³ Pquiab zho rēb zho:

—iNguṅdziin ye! iTel no, zha xtiipaa Abraham nac no, wlalaa gard gac no nguṅdziin lo miech! ĵPe lo dzigo laa no, ne rnee luu laa xtiidz luu csilaa no?

³⁴ Dzigo rēbchaa me:

—Golquiaadiaga ganle: zha ne tibaque noyunctal xtol, rrieequiacxe waa tib nguṅdziin nac zho lo dol ga, sac lēew rṅabey zho.

³⁵ Ni zha ne nac nguṅdziin lēē, zig ruṅ miech nēz rii, grieelod xoon zho lo meṅ ne rree zho; saṅgue zha ne nac mēēd, choot lo ngadood zho.

³⁶ Gacxe waa, tel csilaa Xpēēd Dios to, dzigosi choot lo ngadoodraa to.

³⁷ Nli lo xtii Abraham ziaad to; per laa to quia goṅ quiaguib to dien zha gut to naa, sac racladzde to yquiaadiag to zhiwseed naa.

³⁸ Laa naa rne grē miṅe blu Pxoz naa lo naa, zeene no naa lo me; saṅgue to goṅ, laa to zienal miṅe rṅabey meṅ ne nac pxoz to.

³⁹ Pquiab zho rēb zho:

—iNi Abraham goṅ nac pxoz no!

—¡Nlid ga nagon! —rëb me lo zho—. Telne niaca mine nli zhinpaa Abraham nac to, zun to grë mine been me.

⁴⁰ Per na gon lel racladz to gut to naa, loxaque ne rseed naa to mine nac diidzli, mine blu Dios lo naa. ¡Tel Abraham led squid been Abraham!

⁴¹ Ni lalnu zienalde to mine been Abraham, sinque laa to noyun mine run zha ne nlipaa nac pxoz to.

Pquiab zho rëb zho:

—¡Led-xe mëed ro nëzd no waa! Tibaque men ne nac pxoz no, ni lëe men co nac Dios.

⁴² Dzigo rëbcha me lo zho:

—Telne niaca mine nli zhin Dios nac to, nleynie to naa, sac gon lo me brie naa zial naa lo to nu. Led zhaald naa zial naa, me nac men ne pxeel naa.

⁴³ Ib rioguidce to zha nac grë mine rne naa, ib riende tow, sacne ib nëde to yquiaadiag tow.

⁴⁴ Golgacnan sca ganle, lëe pxoz to ga gon nac mendox, lo ma ngab to, gacxe waa rdziladz to run to grë ncuaane run ma. Tel mendox, haxta zeene biaan guidzliu tibaque nonitlo ma miech, ni ib rneed ma mine nac diidzli, sac ib nand ma zha nac diidzli. Ible lëe xtsiin ma ga nac guielwquidie, gacxe waa ma nac pxoz zha ne rquidie.

⁴⁵ ¡Min co nagon, niicle diidzli nac grë mine rne naa lo to, per ib rliladzde tow!

⁴⁶ Ni tib to choot grieelod gnë laa naa noquidie, sac niapse diidzli rne naa. ¿Pe nac dzigo rliladzde to mine rne naa?

⁴⁷ Grëse zha ne nlipaa ngab xnëz Dios, rley zho rquiaadiag zho xtiidz Dios; per to gon led xnëzd me ngab to, gacxe waa nëde to yquiaadiag tow.

48 Horco pquiab zho rëb zho lo me:

—¡Psoog ro luu men Samar ngoopdo! ¡Nlique mine rnee no ga nagon, ne mendox noguitnie luu!

49 —Choot mendzab noguitnied naa —rëb Jesús—, sinque laa naa noxco xoobnen ganle pa lotaa men nroob nac Pxoza naa; laa to gon lel rsanwin to naa.

50 Noguibd naa dien zha guiaannon naa, per Dios gon racladz me ne sca gaca; ni mesi nan me pe run me.

51 Gneli naa lo to ganle; ¡Grëse zha ne gzoob xtidz naa, gdziñd dze ne guet zho!

52 Pquiab zho rëb zho:

—¡Per nlique nagon mendox noguitnie luu! Zig nac Abraham name gut me, grë zha ne biadteed xtiidz Dios ne, grëse zho gut zho. ¿Zha nac dzigo rnee luu, zha ne gzoob xtiidz luu, gdziñd dze guet zho?

53 ¿Pe mazdraa dzigo nac luu lo pxozgol ne Abraham, lo grëgaa zha ne biadteed xtiidz Dios ga? ¿Chorzac luu nac luu?

54 Rëbchaa me:

—Telne lëëque naa noyunnon naa, nlid mine rne naa dzigo. Per na gon, Pxoza naa, men ne nac Dios ne rnee to rliladz to, me rlu ganle ne nli men non nac naa.

55 Tel naa runbey naa me, ni run naa mine rnabey me; sangue to gon, nlid runbey to me. Tel gni naa runbeyd naa me, yele naa ga dzigo noquidie zigne rquidie to.

56 Pxoza gol to Abraham, bley me zeene gocnan me laa naa znu guial lo guidzliu rii. Ni zeene bdeed Dios diidz gon me naa, mazdraa bley me.

57 Zeene bin zho sca rëb me, rëbchaa zho:

—¿Gon̄ luu Abraham ye? ¡Ni chooptsii iz name rapd̄ luu! ¡Zha dzigo gon̄ luu Abraham!

⁵⁸ —Gneli naa lo to gan̄le —rēb me—, notaque naa; nole naa zeene gol Abraham.

⁵⁹ Horco ptop zho quie laa zho gdeedquie me, per znuse bded me lad zho brieē me len̄ yadoo, gon̄draa zho me.

9

Biac tib mgui ne rold lo

¹ Zieded Jesús tib lugar co, gon̄ me tib mgui ne rcow lo, scale nac lo men̄ co zeene gol me.

² Dzigo bnabdiidz xpēēdscuel Jesús rēb zho:

—Maestro, ¿bay zha nacne squi golnie men̄ qui guielnē qui? ¿Pe no pe xtol̄ mew, te xtol̄ xmen̄gol mew ye?

³ —Lēda —rēb Jesús—, led por xtold̄ zhow; sinque squi gol me, zeena zeene laa me guiac, ga gan̄ miech gan̄le zha nactaa grē ncuane run̄ Dios.

⁴ Zhile laa liu ycow. None dzioxco ne dziuun ne xtsiin̄ men̄ ne pxeel̄ naa laga nasraa bii zob ngbidz, sac deque ycow liu choot grieelodraa gun̄ dziin.

⁵ Laga bii no naa lo guidzliu rii, naa nac zig tib biini ne rziini lo grē miech rii.

⁶ Blozhse sca bnee me, ptsuc me lo liu, bzhix-cuaa me niip ben̄, dzigo bdēēb mew zhits guidlo mgui ne rcow lo ga;

⁷ blozh ga, rēbchaa me:

—Güey na, güeytiib lo luu ro pil Siloé.

(Siloé nac zig nacne rnee ne Pxeel̄ zho zho.)

Dzigo güey mgui co güeytiib me lo me, zeene laa me wbire laa me ran̄le.

⁸ Grë zha ne no gax zaatne no me, ni grë zha ne runbey me; zeene gon zho me, rnee^hchaa zho:

—¿Mgui rii ga lëe rzob gdib i rnab gon?

⁹ No zho rnee mew, nogaa zho rnee led meda.

—Squidaa rlu me —rnee zho—, per led med i.

Nacne pquiab me mezhäl rëb lo zho:

—Naaw, naa nac mgui co.

¹⁰ Dzigo bnabdiidz zho zha biac lo me. Rëbchaa me:

¹¹ —Men ne rnee zho lë Jesús, men co bzhixcuaa niip ben dzigo bdëeb mew zhits guidlo naa, blozh ga pxeel me naa biatiib naa lo naa ro pil Siloé; zeene laa naa wbire laa lo naa biacle.

¹² —¿Yo men co niina na? —rëb zho.

—Dieenda —rëb me—, nand naa dien yo me.

¹³ Dzigo güey zho güeynie zho me lo grë zha ne nac zha farisé;

¹⁴ sac lëetse dze ne rdziiladz zho lo dziin, lëetse dze co sca beenguiac Jesús lo me.

¹⁵ Grë zha farisé co, biire zho bnabdiidz zho lo me dien zha biac me; dzigo bzodiidz me lo zho zha bdëeb Jesús niip ben lo me, blozh ga güeytiib me lo me, zeene laa me wbire laaw biacle.

¹⁶ Blalaa zha farisé ne ndxie ga, psilo zho rnee zho:

—Nlid ne Dios pxeel men co, gacxe waa niicle runbeydraa me pa dze nac dze nda.

Pquiab zla zho rnee:

—Tel cholze miech ngoopdol nac me, ¿niacxe zrieelo gun me grë milagr qui?

Zhaase zhaase rnee zho.

¹⁷ Dzigo wbiire zho bnabdiidz zho lo me, rëb zho:

—Luu waa, ¿cho rzac luu nac meṅ ne beenguiaac lo luu ga?

Pquiab me rëb me:

—Ible Dios pxeel me. Tib meṅ ne ziadteed xtiidz Dios lo miech nac me.

¹⁸ Per ib rliladzd grë zha wxtis co ne biac lo me, sac rliladzd zho ne rold lo me glo; dzigo bnabey zho gocredz pxoz me, gocredz xniaa me.

¹⁹ Bdzin grop meṅgol co, rëbchaa zho:

—¿Pe nli xpëed to nac meṅ rii? ¿Pe nli na rold lo me zeene gol me? Tel nli rold lo me, ¿zha biac lo me ne laa me ran niina?

²⁰ —Nli xpëed no nac me —rëb grop meṅgol co—. Ni nli rold lo me zeene gol me;

²¹ per ndiond no dien zha biaca ne laa me ran niina, niicle ndiondga no dien pe no cho beenguiaa. Benque zha gol-le nac me, mazd lo me golnabdiidz, mezhah gnë dien zha biac lo me.

²²⁻²³ Sca rëb grop meṅgol co, sac rdzieb zho griee zho xyadoo zho. Biaanle grë zha rnabey co diidz: zha ne guiab Jesús nac Meṅ ne zëëble diidz ga cxeel Dios lo guidzliu; csaandraa zho sëëb zho yadoo.

²⁴ Wbiire zho bredz zho meṅ ne biac lo ga, rëb zho:

—Bieṅ ganle Dios zobwi, bnë diidzli lo no; sac tel no ndion no cholze miech ngoopdol nac meṅ co.

²⁵ —Dieenda —rëb me—. Nand naa dien pe miech ngoopdol nac me, te meṅ wena ye. Per me gon beenguiaac lo naa, sac rold lo naa glo.

²⁶ Dzigo biire zho bnabdiidz zho stib dien zha beenguiaac Jesús lo me.

²⁷ Pquiab me rëb me:

—Ledaaw nile naa lo to, per ib riladzde tow. ¿Zha nac dzigo ne racladz to gonaque tow stib? ¿Te racladz to ye, ye to sēēb xnēz me?

²⁸ Dzigo psilo zho ndox zho lo me, rēb zho:

—Luuzhe tel_l xnēz me no luu, sangue tel_l no zhiwseed Moisés, miñ co zional_l no.

²⁹ Sac tel_l Moisés, ndion_l no nli Dios pxeel_l Moisés, per mgui co ni ndion_l no dien_l pa brieē me.

³⁰ Pquiab me rēb me:

—iNcuaañe gzeegaa zdoo ne i runbeydaque to cho nac me, ni ron to me been_lguiac lo naa!

³¹ Ndion_l ne gan_lle rquiaadiagd Dios xtiidz cholze miech ngoopdo_l, sinque laa me rquiaadiag xtiidz zha ne rien_l ne nli meñ nroob nac me, ni run_l zho miñe rnabey me.

³² Stiba, wлтаа gard dzion ne cho zha been_lguiac lo tib miech ne znu gol ro_ld lo.

³³ Tel_lne niaca miñe nacdied Dios meñ co, nrieelod me niun_lguiac me lo naa.

³⁴ —iPsoog ro luu! —rēb zho lo me—. ijb racladz no guiaad tib ngoopdo_l nu guiadseed no!

Horco wbig zho, blee zho me ga.

Zha ne ro_ld lo

³⁵ Bin Jesús sca blee zho me ga, dzigo zeene bdzieel Jesús me, rēbchaa Jesús lo me:

—¿Pe riladz luu meñ ne nac Xpēēd Dios?

³⁶ Pquiab me rēb me:

—Bzhiguiel_l bnē lo naa dien_l cho nac meñ co, zeena gliladz naa me.

³⁷ —Goñle luu me —rēb Jesús—. Naa goñ nac meñ co, lēē me nu nozodiidznie luu niina.

³⁸ Dzigo pquiitsgzhib me lo Jesús, ni rēb me:

—Dib zdoo naa rlladz naa ne nli Xpëed Dios nac luu.

³⁹ Blozh ga rëbchaa Jesús:

—Laa naa zial lo guidzliu rii, zeena glu dien cho rap dol, dien chogaa rapd dol; sac zha ne rzac miech peet riend, laa zho tsaa biini; laa zha ne rzoob zho niini, laa xquielrien zho ycow, guiaan zho zig tib zha ne rold lo.

⁴⁰ Blalaa zha farisé zo ga, zeene bin zho sca rëb me, rëbchaa zho lo me:

—¿Rzë diidz qui na lëe ye lo no rold?

⁴¹ Dzigo pquiab me rëb me lo zho:

—Tel niaca mine nlipaa zha ne rold lo nac to, grielod gni naa rap to dol. Per na, ne masaque rzac to rolraa lo to, gane grëse ncuane quiayun to xtol to noyaca, to zëeba.

10

Mëcwxiil ni zha ne rquianap ma

¹ Ni rëb Jesús:

—Golquiaadiaga ganle: grëse zha rded stib nëz zeene rzëeb zho len lidz mëcwxiil, laa ne ted zho nëz ro puert, gase rlu ngbaan ga nac zho;

² sac tel men ne noyan maw, nëz ro puert nëz co rzëeb me.

³ Zha ne rquianap ro lidz ma, ga rxal zho rded me; niicle magaaw, zeene ron ma tsi me, grëse ma rdziñ lo me; dzigo rbedz me ma, rneelë me ma tib tib ma, laa me rbee ma ga.

⁴ Rlozhse rbee me grë ma ne nac xma me, laa me rner lo ma; grëse ma laa ma rnal zhits me sacne runbey ma tsi me.

⁵ Riena_{ld} ma zhits stib miech, zeene ran ma zho znuse rzhoon ma; sac runbeyd ma tsi zho.

⁶ Grē zha ne ndxie lo me ga, ib biend zho zha nac godiidz co;

⁷ dzigo wbiire me bnee me lo zho, rēb me:

—Golquiaadiaga ganle: Naa gon nac zig ro Puert, zaatne rded mēcwxiiil ga.

⁸ Grēse zha ne biaad glo rnee zho zha nac Men ne nacle diidz cxeel Dios ga, grēse zha co ngbaan ga nac zho, loxaque psacsi zho par grieelo cuan zho; ni grēse mēcwxiiil ne nacpaa xpēcwxiiil naa, güeyna_{ld} ma zhits zho.

⁹ Sangue naa, laa naa nile lo to ganle: Naa nac zig ro Puert, zaatne rded mēcwxiiil ga. Grēse zha ne gbig lo naa, zlaa zho, peet lo tsoxtseebdraa zho; pale grē mēcwxiiil ne zozēēb zoriee ro lidz, ni rdziel ma guizh nguia, guizh ndzon row ma.

¹⁰ Zha ne nac ngbaan, zeene riaad zho loxaque rban zho ni rut zho; sangue naa, laa naa zial zeena yгаа to tib guielmban ne mazdraa ndzon, tib guielmban ne gdzi_{nd} dze lozh.

¹¹ 'Naa nac Baxtor ne nquialadzpaа xpēcwxiiil. Sac zha ne nquialadzpaа xpēcwxiiil, rquiad zdoо zho xquielmban zho, rsilaa zho ma lo guielxtseeb ne notaa ma.

¹² Per tel noyac-wree zha ne noyan ma, rquiad zdoо zho ma, zigne ran zho palo ziaad tib coyot ntseeb, ndxieque mēcwxiiil ga laa zho rzhoon; sac led chend zho ma, led zhad nac xbaxtor ma. Zeene rdzi_n coyot, nēzrii nēzrec rtsieets coyot ma, nogaa ma rgaa lo coyot.

¹³ Rzhoon zho, sac dimise nonie guic zho, peet liaadz nod zho ma.

¹⁴⁻¹⁵ Naa nac Baxtor ne nquialadz xpëcwxiil. Zigne runbey Pxo_z naa naa ni runbey naa me, sca runbey naa grëse xpëcwxiil naa, niicle magaaw runbey ma naa. Grëse ma, rleynie naa ma, laa naa rbeeladz xquielmban naa totsaque cuee naa ma lo guielxtseeb ne no ma.

¹⁶ 'No spalal xpëcwxiil naa, ma ne ngabd len corral rii; grëse ma co, ible zon ma tsi naa sac laa naa no gaxi ma, zeena tipse gac ma grë ma yquianaap naa ma.

¹⁷ 'Men ne nac Pxo_z naa, rleynie me naa sac laa naa rbeeladz xquielmban naa; per ible zriebaanaa.

¹⁸ Naazhal rbeeladz xquielmban naa, choot grielod lega ctiche xquielmban naa. Rap naa poder gded naa xquielmban naa, ni rap naa poder gbire gban naa stib. Dios bneedz diidzbey co lo naa.

¹⁹ Grë zha Israel ne ndxie ga, zeene bin zho sca rnee me, laa zho goc chop dii stib.

²⁰ No zho rnee:

—Yase mendox noguitnie guic men qui, o rzhinlegaa guic me. ¿Pe nacne rquiaadiag to xtiidz me?

²¹ Rquiab stib zho rnee:

—Niini rzë xtiidz men qui, led squid rac zha ne noguitnie mendox. Stiba, ¿niacxe zrieelo mendox gunguiac ma tib lo zha ne rold lo?

Rnee Jesús Xpëed Dios nac me

²² Len mëë ne rac na_la, len dze co noyac tib lni Jerusalén, lni ne run zho rsoladz zho dze ne glopaa psilo quiaquiin yadoo. Ye Jesús bdziñ Jerusalén len dze co.

23 Laa me zieded tib len nsaap ne quia cho yadoo co, nsaap ne rnee zho zhiNsaap rey Salomón;

24 zeeṇe wbig bla zha ne rnabey Israel, bnabdi-idz zho lo me rēb zho:

—¿Poc dzigo gdziṇ dze ne gnē luu diidzli lo no? Telne nli luu nac Men ne zēēble diidz ga cxeel Dios guiaad lo guidzliu, niinagazh bnēw lo no.

25 Pquiab Jesús rēb me:

—Blactaale zine naaw lo to, per rliladzde tow. Stiba, pe zhidaa milagr ne ziyaṇ to ruṇ naa, gase rlu ganle cho nac naa; sac Dios men ne nac Pxoz naa, men co racniēn naa ruṇ naaw.

26 Ib rliladzde tow, sacne led yede to ngab lo naa.

27 Tel zha ne ngab lo naaw, ruṇbey zho naa; niicle naagaaw ruṇbey naa zho, ni zhits naa rzēnal zho.

28 Grēse zho, rded naa tib guielmban ne gdziṇd dze lozh lo zho, ni gdziṇd dze nitlo zho. Choot grieelod ctiche zho lo naa,

29 sac men nroob nac Pxoz naa men ne pxeel zho lo naa; choot grieelod cuee zho ladznia me.

30 Ni tibaque nac no grop no me.

31 Zeēne bin grē zha rnabey co sca rēb me, psilo zho ptop zho quie naṇ zho ngoquie zho me.

32 Dzigo rēbchaa me lo zho:

—Lo grētaa milagr ne quiayacniēn Pxoz naa naa quiayun naa lo to. Golnē dien, ¿pa miṇ rlisqui to ne laa to racladz gneedzquie to naa?

33 Pquiab zho rēb zho:

—¿Coquiedaxe no luu waa por grē milagr ne ruṇ luu, sinque laa no coquie luu por grē diidz ne rnee luu i, quiaguitnie luu Dios! ¿Tib miech beṇse name nac luu, ni rnee luu laa luu nac Dios!

34 Dzigo rëbchaa me lo zho:

—¡Lo xlibr ley to name zhobnee zha rzac Dios zha ne pcaania xtiidz me, rëb me dios nac zho!

35 Ni ndion ne ganle, grëse minë rnee lo Xtiidz Dios, diidzliw; gacxe waa tel sca rëb me lo zha ne pcaania xtiidz me ga,

36 ¿niacxe rguitnie naa me ga, zeene rne naa Xpëed me nac naa, ni mezhal bzooblo naa pxeel me naa lo guidzliu rii?

37 Telne rund naa milagr ne rlu Dios pxeel naa, ib gliladzde to naa.

38 Per telne ran to rlu ne me nacie naa, maase gliladzde to naa totsaque golliladz ne me nacie naa; tsow guien to ganle ne tibaque nac no grop no me, zigtaa nacie me naa, scaque nacie naa me.

39 Horco gocladz zho stib naaz zho me, per znuse brieë me nia zho.

40 Dzigo brieë me ga güey me ro guiubee Jordán, zaatne bio Juan pchoobnis Juan miech; ga blëz me palal dze.

41 Nzian miech ne güey lo me ga, rnee zho:

—Nli beend Juan ni tib milagr nroob, per grëse minë bnee me zeene bzeet me men rii, zigne bneese me laaw norieequia niina.

42 Nzian grë miech ne güeyquiaadiag zhiwseed me ga, dib zdoo zho bliladz zho ne me nac Men ne zëëble diidz ga cxeel Dios.

11

¹ Len dze co blanguidz tib mgui ne no guiedz Betain, lë Lazz; no chop bzian Lazz tib zho lë Mart stib zho lë Marí.

² (Lëë Marí rii pchoob tiblo nceit nex ni Jesús, ni pcuiidz mew con guitsguic me.)

³ Dzigo pxeel grop wnaa co diidz lo Jesús, gacnañ me laa Lazz rzacnë, sac nañ zho rleyniedox me Lazz.

⁴ Zeene blanso diidz, nëchaa me:

—Peet tsienied guic to, niicle tel blanguidz me per nacda par guet me, sinque par glu ganle pa lotaa men nroob nac Dios. Ga glu ganle pa lotaa men nroob nac Xpëed me.

⁵ Zigtaa Maríw, zigtaa Marta, zigtagaa Lazha, nquialadz Jesús zho gza zho,

⁶ per ib biobladdz me; lel blëz me schop ngbidz zaatne no me ga.

⁷ Dzigoraa në me lo no:

—Laa ne guio nëz xtan men Judé stib.

⁸ Dzigo rdzieets no:

—Maestro, ¿racladz luu tsie luu nëz co stib ye? Pense name goc bla ngbidz ga gocladz zho ngoquie zho luu ga.

⁹ Nëchaa me:

—Tsiipchopraa hor name rziini ngbidz, ni laga niini rna zac tibliladz zia ne, noxtseebd ne lega pa griel ni ne;

¹⁰ loxaque pcow liu, noxtseeb pa griel ni ne; sac ncow rna.

¹¹ Blozh ga në me:

—Laa xamigw ne Lazz nixguiesle, per na laa ne guio zeena gabee naa zhimcaalo me.

¹²⁻¹³ Tibaque ndion no nli nixguies Lazz, dzigo rdzieets no lo me:

—Telne raagüesle me, zac-wen me sca.
Ib biend no ne gutle Lazh, gane sca rnee me.

¹⁴ Dzigoraa clar bnee me lo no, në me:

—Laa Lazh gutle.

¹⁵ Ni rley naa gon ne guiend naa ga dze co, zeena sca grieelo lozh gliladz to ganle cho nac naa. Golgotsaa guio ne nëz lo me ga niina sca.

¹⁶ Laa Mazh, zha ne rnee zho “Mëëdgrop”, zeene bin Mazh sca në me, rneechaa Mazh lo no:

—Guiend rson, golgotsaa cchoob zdoo ne guional ne zhits me dien. Tel gut zho me, maase gut zho ne.

Jesús rbeeban ni me rdeed guielmban

¹⁷⁻¹⁹ Gax Jerusalén riaan Betain. Zha ne rriee Jerusalén, maase grol hor run zho nëz rdziñ zho Betain. Nzian grè zha Jerusalén rdziñ riequiaabdiuzh zho Marí grop Mart, riechoobladz zho zdoo me lo xquielnë me ga.

Dze ne rac tap ngbidz bioliu Lazh, dzigoraa laa Jesús bdziñ.

²⁰ Gon Mart pa lo ziaad Jesús, dzigo brie me biaad-xinëz me Jesús; laa Marí biaan ro yu.

²¹ —Jesús —rëb Mart—, telne niaca mine nu no luu segur niete bzian naa;

²² sac nan naa, grëtaa ncuaane rnab luu lo Dios, run me mine rnab luu.

²³ —Peet tsienied guic luu —rëb Jesús—, ible zrieeban bzian luu.

²⁴ Pquiab Mart, rëb Mart:

—Nliw, nanpaa naa ible zrieeban me gal dze ne laa guidzliu rii nitlo, zeene grëse men gut, laa zho grieeban.

²⁵ Dzigo rëb Jesús:

—Naa nac meṇ ne rbeeban grë meṅgut, ni naa nac meṇ ne rdeed guielmban lo grë miech. Grëse zha ne dib zdoo gliladz naa, niicle guet zho zig ret grëraa miech rii, zdiṇ dze ne gban zho stib.

²⁶ Sac grëse zha ne dib zdoo rliladz naa, laa zho bgaale tib guielmban ndzon ga, guiaand zho ladznia guielgut. ¿Led rliladz luu lëë Mart, ne sca gaca?

²⁷ —Rliladz naaw —rëb Mart—. Rliladz naa ne luu nac meṇ ne bzooblo Dios ga, luu nac Xpëéd Dios, Meṇ ne zëëble diidz ga cxeel me guiaad lo guidzliu.

²⁸ Blozhse ga, wbiere Mart zie Mart zietsedz Mart Marí. Bdziṇ Mart zhliaanse bredz Mart Marí (sac nzian zha ne ndxie ga ziequiaabdiuzh Marí) rëb Mart:

—Niinapaale blanso Maestro, na laa me rbeedz luu.

²⁹ Zigne bin Marí sca rëb Mart, brieë nguzhoon Marí laa Marí zie nëz co.

³⁰ (Bdziṇ Marí, laa Jesús bii zo zaatne güeydziel Mart me ga; gase blëz me, bzëëbd me lad guiedz.)

³¹ Grë meṇ Israel, zha ne ndxie lidz Marí ga ziechoobladz zdoo me, zeene gon zho sca lëëled brieë me, nalaque zho zhits me; sac nan zho bod ro xpaa bzian me ziegoon me.

³² Zigne bdziṇ me zaatne zo Jesús ga, pquiits-gzhib me lo Jesús.

—Jesús, luu ne nac luu meṇ ne rnabey —rëb me—, telne niaca miṇe nu no luu zeene blanguidz bzian naa, niete me.

³³ Psilo Marí roon Marí. Zeene gon Jesús, niicle Maríw, niicle grë zha Israel ne bdziñ ga, mban rac zho, grëse zho roon, dzigo ye me biab guielñe me.

³⁴ Bnabdiidz me rëb me:

—¿Pa lo pqueets to me?

—Dë ganle —rëb zho—, zeena gan luu pa lo bgueets me.

³⁵ Horco psilo Jesús biin me.

³⁶ Grë zha Israel co, zeene gon zho roon me, rneechaa zho:

—¿Golwi ganle, blactaa nquialadz me Lazh!

³⁷ Laa zla zho rnee:

—Led me name beenguiac lo mgui ne rold lo ga, ¿pe nriee lod zha niuñ me, zeena niete Lazh?

Brieaban Lazh

³⁸ Zeene laa Jesús bdziñ ro baan Lazh, biire biab guielñe me.

Zig nac tib bliee niaa baa co; rna tib quie nroob ntse zaatne rsëeb zho ngutoo;

³⁹ dzigo bnabey Jesús cob zho quie co.

Pquiab Mart, bzian ngutoo co rëb me:

—¿Mazd gdiobda! ¿Nadze rac tap ngbidz gut me, mbanle na rlaa me!

⁴⁰ Dzigo rëbchaa Jesús:

—Led laa naa nile lo luu, telne dib zdoo luu rililadz luu naa, bii zañ luu ganle zha nactaa grë ncuane ndzon ne run Dios.

⁴¹ Zeene blozh bdoz zho quie co, dzigo blis Jesús lo me nëz gbaa, ni rëb me:

—Dios, luu ne nac luu Pxoz naa, xquizh xquielnzaac luu sac rquiaadiag luu miñe rne naa.

42 Nan naa tibaque rquiaadiag luu mine rnee naa, per laa naa rzeta niina, zeena grëse miech ne ndxie nu gliladz zho ganle ne nli luu pxeel naa.

43 Dzigo nguiedz bredz me, rëb me:

—¡Lazh, brieë i!

44 Zigne sca bnee me, laa ngutoo co brieë ga, scase nriel lar dib nia me, dib ni me ne, ni nioog stib lë lar lo me. Dzigo rëb Jesús:

—¡Golxadz grë lar ne nriel me i, zeena guey me!

Rguib zho dien zha yгаа Jesús

(Mt. 26:1-5; Mr. 14:1-2; Lc. 22:1-2)

45 Grë men Israel ne güeynal zhits Marí ga, zeene gon zho sca bleeban Jesús Lazh, nzian zho bliladz ne nli Dios pxeel me.

46 Nogaa zho lel güey zho güeyzodiidz zho lo grë zha farisé zha bleeban me Lazh.

47 Horco lëéléd pcaalsa grë pxoz ne rnabey, ni grë zha farisé, rëb zho:

—¿Pe gnë to dien zha gaca? ¿Zha dziuun ne mgui ne rnee zho Jesús ga, sac gon pe zhidaa milagr ne quiayun me?

48 Telne squise csaan ne me, mbe grëse miech sëëb xnëz me; lozh ga, zeene gacnan men rnabey ne zob Romaw, laa me cxeel grë xmenGUIIB me guiaadnitlo zho xyadoo ne, guiaadnitlo zho la dz ne.

49 Dzigo pquiab Caifás, men ne nac pxoz nroob len iz co, rëb me lo zho:

—¡Ni lal nu lëë peet riende to!

50 ¿Pe riende to mazd wena yгаа tib zha guet zho, zha quizh par gdib guiedz, lëdle grëse zha la dz ne nitlo?

⁵¹ Zeene sca rëb Caifás meñ ne nac pxoz nroob ga, ga bzeet me ible no guet Jesús par csilaa me grëse miech lo dol; per led guicd me biaba, sinque Dios psiaaba guic me. Ga goquiet ne laa Jesús guet, par csilaa me grëse zha Israel,

⁵² ni grëragaa zha ne no dipse lo guidzliu, zeena tipse gac grëse zha ne nac xpëed Dios.

⁵³ Dzigo grëse zha ne nac wxtis ga, laa zho biaan diidz ne ible no ygaa Jesús gut zho me.

⁵⁴ Nacne briedraa Jesús ne nenlo nian zho me; dzigo mazd laa me brieenie no xtan zha Judé, güeynie me no zaatne wzhi no miech, bdziñ no tib guiedz win lë Efraín, ga bliaaz no grë no me.

⁵⁵ Len ngbidz co, ziaadyob lni Pascw. Nzian grë miech ne no grë guiedzlas ne ndxie dib ga, laa zho rsilo quiariee zie zho nëz Jerusalén; sac ansraa csilo Pascw nzian zho rie yadoo run zho grëse mine rnabey ley par guiaanmbe zho lo xtol zho.

⁵⁶ Grëse zha ne rdziñ, len yadoo no zho rnabdi-idzlsa zho dien pe zdziñ Jesús lo lni; sac grëse zho racladz gan me.

⁵⁷ Laa grë pxoz ne rnabey, ni grë zha farisé, laa zho bnabeyle, zha ne ganta Jesús, tsienie zho diidz parne tsie zha ne tsienaaaz me.

12

*Pchoob tib wnaa nceit nex guic Jesús
(Mt. 26:6-13; Mr. 14:3-9)*

¹ Sxoop ngbidz gdziñ dze lni Pascwa, güey Jesús guiedz Betain, zaatne no Lazh, meñ ne bleeban me ga.

² Sac grēse menlidz Lazh, beenlo zho tib xtsee, gownie zho me.

Mezh no zho, laga laa Lazh zobnie me, laa Mart nodziib ncuane gowxtsee zho lo mezh,

³ tibaque zeene bzëeb Marí bzëebnie Marí tib lo nceit nex ne rriee guiee ne lë nard, tib lo nceit niazha, rgaaw maase grol boté. Zigne bdziñ Marí bdëeb Marí nceit co ni Jesús, blozh ga con guitsguic Marí pcuudz Marí ni me. Dipse len yu zëbqlaa nceit co.

⁴ Laa Judas Iscariot, tib zha ne nacgza no (zha ne bded ga pto me) zeene gon Judas sca bdëeb Marí nceit co ni Jesús, rneechaa Judas:

⁵ —Mazd tebaa zha ndo nceit qui. Nguizhpaa zhow maase tson gayoo pes plat, dzigo needz zho dimi co ngaaza lo grë zha mban ne guiend pe yquiin.

⁶ Sca rnee Judas, per nlid ne rquia zdoo Judas zha ne guiend pe yquiin, sinque laa Judas rguib dien zha cuan Judas dimi co, sac Judas ngotsow bziuud ne no dimi; zigse racló dimi len bziuud co, zhlianse rbee Judas dimi co.

⁷ Dzigo rëbchaa Jesús:

—Psaan me. Ib laa me bdëeb nceit qui ni naa, zeena nzhixcuaale xcuerp naa gal dze ne laa naa ygueets.

⁸ Telne racladz to gun to xyudar zha ne guiend pe yquiin, tibaque ranlsa to grë to zho, zac tsow ygad to lo zho; sanque naa zdziñ dze gandraa to naa.

⁹ Ndal grë zha Israel, zeene bin zho laa Jesús no guiedz Betain, bio zho nëz güey zho lo me ga, ni güeyso zho lo Lazh, men ne bleeban me ga.

¹⁰ Zeene gon grë pxoz rnabey cow, nacne bnedi-
idzaque zho ye Lazzh none gut zho;

¹¹ sac por Lazzh, nzian grë zha non, laa zho rbig
nëz lo Jesús, laa zho riladz ne nli me nac Men ne
zëëble diidz ga cxeel Dios.

Bzëëb Jesús Jerusalén

(Mt. 21:1-11; Mr. 11:1-11; Lc. 19:28-40)

¹² Biini liu co, dipse lad guiedz Jerusalén zhoob
diidz laa Jesús gdziñ ga dze co. Grë miech guizhiu
ne bdziñ ga zie lni Pascw,

¹³ psilo zho brieë zho ziaad-xinëz zho me; tib tib
zho nzheñse zho tib lë zin. Lo guielbley co, zeene
gon zho me, psilo zho nguiedz roptsie zho, rnee
zho:

—¡Zha men nroobtaa nac Dios! ¡Zha ndzontaa
men rii pxeel Dios ziaad lo ne! ¡Lëë men rii gnabey
Israel!

¹⁴ Laa Jesús, zobse me lad tib burr yeen, zigne
raquiet lo Xtiidz Dios zaatne rnee:

¹⁵ Grëse to men Israel, gdziebde to.

¡Golwi ganle, laa men ne rnabey ladz to ziaad i,
zobse me lad tib burr yeen!

¹⁶ Grëse no ne nac no xpëëdscuel me, ni tib no
biend hor co ne grëse ncuaane noyac ga, raqui-
etlew lo Xtiidz Dios; sinque haxta zeyle me gbaa,
dzigoraa psoladz no nzian grë ncuaane raquiet
lo Xtiidz Dios ga, gonlo no goca; ni bien no Jesús
raquiet ga.

¹⁷ Lad grë miech guizhiu co no nzian zha ne
gon zha bleeban me Lazzh, dzigo nguiedz rzodiidz
zhow lo grë miech co.

¹⁸ Ni nzian grë miech co, laa zho blanso ga ziaadinëz zho me, sac bin zho zha been me milagr nroob co.

¹⁹ Grë zha farisé, zeene gon zho grë miech guizhiu co, rneechaa zho:

—jPe zhidaa grë miech qui racnie men qui!
jPeraa nadien dziuun ne!

Rguib bla zha Gres Jesús

²⁰ Lad grë miech ne bdzin Jerusalén ga, ziegan Dios len ngbidz Pascw co, lad co no blalaa zha zit ne nacd zha Israel,

²¹ dzigo bnee zho lo Lip (zha Betsaid nac Lip) rëb zho:

—Bzhiguiel bnë dien pa lo no Jesús, laa no racladz dzian no me.

²² Dzigo güey Lip rëb Lipa lo Ndrés, blozh ga güey zho grop zho güeynie zho diidz lo Jesús.

²³ Dzigo rëbchaa me lo zho:

—Naa ne nac naa Mgui ne pxeel Dios, niinataa nagon laa dze bdzin zeene laa naa gbire guia gbaa stib.

²⁴ Golquiaadiaga ganle: Tib zhobxtil, telne tsoda liu tibaque zhob naca; per zeene laa zhob co rio liu, nzian raca. Saque naa nagon, none guet naa, none tsoliu naa, zeena gacnzian zha ne ygab xnëz naa.

²⁵ Sac zha ne rquia zdoo xquielmban, znitlonie zhow; sangue zha ne cueeladz xquielmban, zha cosi zgaa zho tib guielmban ndzon ne ib gdziind dze lozh.

²⁶ Zha ne racladz sëeb xnëz naa, none gun zho mine rnabey naa; ni zaatne gdzin naa yeque zho

no gdziṅ ga. Ni grēse zha ne sēeb xnēz naa ni gon zho xtidz naa, zunnon Pxo_z naa zho.

²⁷ Mban rac zdo_o naa niina. Per lēda ga guṅ naa, telne guiep naa lo Pxo_z naa csilaa me naa lo grētaa guielnē ne no teed naa. ¡Sac par miṅcopaa zial naa lo guidzliu rii!

²⁸ 'Dios, luu ne nac luu Pxo_z naa —rēb me—. Blu lo grē miech rii ganle ne meṅ nroob nac luu.

Dzigo bin zho zēeb tib tsi meṅ co gbaa, rēb me:

—Laaw blule naa, ni niina laa naa gbire gluw stib.

²⁹ Nzian grē miech ne ndxie ga, zeene bin zho tsi meṅ co, bzhaac zho nguziw; zha ne bien led nguzida, rnee zho:

—Xanj_l Dios ga gon bnee lo me.

³⁰ Dzigo rēbchaa me lo zho:

—Laa to bin ganle laa Pxo_z naa bnee, ni por to gon bnee me, zeena gon to tsi me ni gliladz to ne me pxeel naa.

³¹ Laa dze nagon bdziṅ zeene laa Dios guṅquish naa xtol grēse miech guidzliu rii; lēe dze bdziṅ zeene laa men_ox piche gnabeydraa ma lo guidzliu rii zigne rnabey ma niina.

³² Sac zeene laa naa quia glaa lo cruz, ga cuedz naa grēse miech zeena sēeb zho xnēz naa.

³³ Ga bzeet me zha gut miech me.

³⁴ Grē miech ne ndxie ga, zeene bin zho sca rēb me, rēbchaa zho:

—¿Guet luu ye? Lo Xtidz Dios name rnee, ib guete Meṅ ne cxeel Dios ga. ¿Zha nac dzigo ne rnee luu laa luu guet? ¿Chopaa dzigo nac luu?

³⁵ Dzigo pquiab me rēb me lo zho:

—Naa nac zig tib biini ne noziini lo miech; ni ngabse dze ne cuëz naa lo to. Laga noziini naa lo to, golsëni zaatne riab biini zeena ygaade to guielcow; sac zha ne rzë lo ncow riend zho palo zie zho.

³⁶ Niina ne rdeeda diidz golliladz cho nac naa, zeena gag to zha ne nlipaa no lo biini.

Blozhse sca rëb me laa me biche ga, blulodraa me lo zho.

³⁷ Niicle gonlo zho nzian milagr ne been me, per ib rliladz zho ne nli Dios pxeel me.

³⁸ Ni ib scalegaa no gaca, sac ga brieequia mine bzeet Isá (tib men ne biadteed xtiidz Dios) zeene znu rëb me:

Dios, bui ganle ni tib choot nëd gliladz xtiidz luu, niicle ran zho grëtaa milagr ne run luu.

³⁹ Ni nligaa ib brieelod nliladz zho me; sac zeene pquiaa Isá, znu rëb me:

⁴⁰ Ncow psan Dios lo zho, ni beenndip me zdoo zho; zeena gand zho me, niicle guiendgaa zho zha gbig zho lo me csilaa me zho lo xtol zho.

⁴¹ Zeene znu bnee Isá, ible Jesús ga bzeet me; sac gon me grëtaa guielndzon ne rap Jesús.

⁴² Ndal zho sca ib bliladz me, per noquegaa zha ne bliladz me; zig nac grë zha ne rnabey lo zha Israel, ndal zho bliladz ne nli Dios pxeel me, per ib pxobnend zhow; sac rdzieb zho cuee zha farisé zho yadoo.

⁴³ ¡Ni stiba rdziladzraa zho guiaannon zho lo miech, laa ne guiaannon zho lo Dios!

⁴⁴ Len dze co, tib vuelte nguiedz bnee Jesús, rëb me:

—¡Grëse zha ne rliladz naa, yele Pxoza naa ga rliladz zho!

⁴⁵ ¡Ni zeene rwi zho lo naa, yele men ne pxeel naa ga ran zho!

⁴⁶ Naa nac zig tib biini ne rziini lo miech, ni grëse zha ne dib zdoo gliladz cho nac naa, zriee zho lo guielcow ne no zho.

⁴⁷ Grëse zha ne gon Xtidz naa, ni gband zho zigne rnabeya, led naad gunquizh zho dol co; sac ziald naa par gdziibdol naa miech, sinque laa naa zial par csilaa naa zho lo dol.

⁴⁸ Xtidz naa gac ley ne gunquizh zhow; zigtaa zhaw zigtagaa grë zha ne nëd gunbey naa, grë zha ne nëd yquiaadiag xtidz naa.

⁴⁹ Sac grëse ncuaane pseed naa miech, led guicd naa biaba, sinque PxoZ naa men ne pxeel naa, men co rnabey naa pe nac mine cseed naa zho.

⁵⁰ Ni nanpaa naa, grëse diidz ne rnabey PxoZ naa naa rne naa, lëew rlu zha ygaa miech tib guielmban ndzon ne gdziind dze lozh; gacxe waa, grëse mine rnabey me gne naa, zigne racladz me scase rne naaw lo to.

13

Rguiib Jesús ni xpëëdsuel me

¹ Guieel ne rsilo lni Pascw; wdze co pcaalsanie Jesús no grëse no ne nac no xpëëdsuel me, laa no nodiowxtsee. Rienle me ne gataa laa dze co bdzin, zeene laa me gbi lo guidzliu rii gbire me lo PxoZ me stib. Grëse zha ne ngab lo me, rleynie me zho; ne nligaa rleynie me zho haxta bdeed me xquielmban me psilaa me zho.

²⁻⁴ Rien me grëtaa ncuaane no, ladznia me psan PxoZ mew; lo PxoZ me brie me ziaad me lo

guidzliu, ni lo Pxoz me gdziṅ me niina ne laa me gbi lo guidzliu.

Laa no zioob no no mezh, tibaque zeene guso me blee me lar ne mbix me, bdziinlen me tib lë lar nool. Par hor co, laa mendox pquiil-le Judas, zhin Simón Iscariot, parne tsieto Judas me.

⁵ Dzigo blaas me nis tib len bandej laa me psilo noguiib me ni grë zha ne nacgza no, zigse rlozh rguiib me ni tib zho scase scase rcuidz mew con lar ne ndxie len me ga.

⁶ Zeene laa me zie quiib me ni Simón Pedr, rëbchaa Simón lo me:

—iLëda i gon! ¿Pe nacne lel luu quiib ni naa?

⁷ Pquiab me rëb me:

—Grieelod guien luu niina, pe nacne quiib naa ni luu; haxta tedraa nu dzigo ganle guien luuw.

⁸ —iNend scaw! —rëb Pedr—. iPer naasi gon gnedzd naa diidz quiib luu ni naa!

Dzigo rëbchaa me:

—Grieelod sca ygab luu xnëz naa, telne siguield luu quiib naa ni luu.

⁹ Horco pquiab Simón, rëb Simón:

—Bzhiguiel sca, niinagazh bdiib ni naa, per led loxaque nidse naa, sinque dib nia naa, dib guic naa bdiib.

¹⁰ Dzigo rëbchaa me:

—Zha ne gozle, nise zho riar; sac mbele zho. Scaque to nagon, mbele to grë to. Grë to rne naa, niicle ne led gzadpaa to mbe.

¹¹ Sca rëb me, sac rienle me cho tsieto me.

¹² Blozhse bdiib me ni no, wbiire wbix me xab co me, bzob me lo mezh; dzigo në me lo no:

—¿Pe bien to na pe nacne znu bdiib naa ni to?

¹³ Golwi ganle: To lëë, Maestro rnee to lo naa, ni rnee to naa nac men r nabey; ni nonguiela gon, sac ne nligaa scaw.

¹⁴ Golgan sca, niicle ne maistr naa, niicle ne naa nac men ne r nabey, per laa naa bdeed zig tib ngundziin win bdiib naa ni to. Nana sca, scaque golgac lo samiech to.

¹⁵ Laa naa blule lo to zha gun to, nana sca goltsienal min co.

¹⁶ Gneli naa lo to ganle, lo grë zha ne nac ngundziin, tsod zha ne nonraa lo zha ne r nabey zho; scaque grë zha ne rie mandad, tsod zha ne nonraa lo zha ne rxeel zho.

¹⁷ Laa to nanlew nasca. Gacxe waa, telne tsienal to wseed rii, zaacse gac lo xquielmban to.

¹⁸ 'Golquiaadiag ganle, grëse mine none naa nu, led par grëde tow. Naa bzooblo to, nanween naa zha nac to tib tib to, ni nanween naa zha rnee lo Xtiidz Dios, rneew: "Lëëque tib zha ne rownie naa, griequia tsielo naa ladznia zha ne gut naa."

¹⁹ Laaw rnegazh naa lo to niina, zeena zeene gaca, gliladz to ganle ne nli naa nac men ne rnee naa nac naa.

²⁰ Ni golgona ganle, grëse zha ne ycaania Espíritu Sant, men ne cxel naa, naale ga nocaania zho; ni zha ne rcaania naa, yele men ne pxeel naa ga rcaania zho.

*Rëb Jesús ne Judas nac zha ne tsieto me
(Mt. 26:20-25; Mr. 14:17-21; Lc. 22:21-23)*

²¹ Horco psilo rlupaa mban goc zdoo Jesús, dzigo bneeli me lo no në me:

—Gneli naa lo to ganle, lëëque tib to gon tsielo naa ladznia zha ne gut naa.

²² Zeene bdzion no sca rnee me, psilo no rwilolsa no, riend no dien cho nac zha ne rzeet me ga.

²³ Cuepaa me, ga zoob naa (rleynie me naa niicle ne raguiald naaw);

²⁴ dzigo blunia Pedr lo naa, gnabdiidz naa lo me dien cho nac zha ne rzeet me ga.

²⁵ Nacne wbig gax naa, bnabdiidz naa lo me.

²⁶ Dzigo nëchaa me:

—Laa naa cobie tib lë guietxtil, ni lo zha ne gan luu gded naa guietxtil co, lëë zho ga.

Dzigo bzhen me tib lë guietxtil, blozhse bloobie me guietxtil co, laa me bdeeda lo Judas.

²⁷ Zigne bnaaz Judas guietxtil co, laa mendox bzëëb zdoo Judas. Dzigo rëbchaa Jesús lo Judas:

—Mïne no guic luu gun luu, na zeen nawdzegazh beëna.

²⁸⁻³⁰ Zigne blozh dow Judas guietxtil co, lëëled brieë Judas ley; pcowle liuw.

Lo grë no ne zioobnie no me lo mezh ga, ni tib no biend pe nacne sca rëb me lo Judas. No zho nan bod no pe ncuane rquiin lo lni co, rxeel me Judas tsiesi Judas, o nogaa pa tsiesan Judas palal dimi lo grë zha ne guieñd pe yquiin; sac Judas nac zha ne ngotsow bziuud win ne no dimi.

³¹ Gonse Jesús laa Judas brieë ley, dzigo nëchaa me lo no:

—Niina nagon bdzin dze zeene glu ganle zha nroobtaa guieñdzon ne rap Mgui ne pxeel Dios, ni ga glu ganle pa lotaa nac guieñdzon ne rap Dios.

³² Ni scaque Dios, zlu me ganle pa lotaa nac guieñdzon ne rap Mgui ne pxeel me ga.

³³ Xin yeëna, jzhile cuëz naa lo to nu! Squiaguib to naa, per zigne rep naa lo grë zha Israel co, laaw

rneque naa lo to niina: Grieelod sēnal to zaatne ga naa.

³⁴ Gane laa naa rsaṅ tib diidz cub rii, ni laa naa rnabey to guṅ tow: Tib tib to, golleynie zha ne nacgrē to, golgantsi zho. Zigne rleynie naa to, sca golleynie zho.

³⁵ Zeene gaṅ miech, ne nligaa dib zdoo to rleynie to samiech to, dzigo zien zho xpēēdsuel naa nac to.

Ible ziab Pedr runbeyd Pedr Jesús

(Mt. 26:31-35; Mr. 14:27-31; Lc. 22:31-34)

³⁶ Dzigo bnabdiidz Pedr lo Jesús, rēb Pedr:

—Maestro, ¿pa dzigo nac zaatne tsie luu?

Dzigo rēbchaa me:

—Zaatne ga naa, grieelod sēnal luu niinagazh; per ib laa luu no guiaadnal.

³⁷ Pquiab Pedr, rēb Pedr:

—¿Per pe nacne grieelod sēnal naa zhits luu niina? ¿Sēnal naa zhits luu goṅ, niicxe maase gut zho naa waa!

³⁸ Dzigo rēbchaa me:

—¿Goon csaand luu naa ye Pedr, niicle gut zho luu? Nlid ga goṅ. Gneli naa lo luu gaṅle, zeene laa gall ycuedz tsonle vuilt rēb luu runbeyd luu naa.

14

Niapse por Jesús gdzin miech lo Dios

¹ Tsode to zhgab, tsode to guielnē. Tiblique golgun guic to, zigne dib zdoo to rililadz to Dios, scaque dib zdoo to golliladz cho nac naa.

² Gologna gaṅle: Zaatne nac lidz Pxoz naa, ndal-doo zaatne cuēz miech no ga, tel niaca miṅe guiend zaatne cuēz to, nile naaw lo to na. Gacxe waa, niina laa naa ga, gzhixcuaa naa zaatne cuēz to ga.

³ Ni zeene lozh gzhixcuaa naa zaatne cuëz to, hor co laa naa gbire guial stib, dzigosi laa to sēnal zhits naa; zeena tibaque zaatne gbiaaz ne.

⁴ Laa to nanle nasca pa lo ga naa, ni nanlegaa to nēz ne.

⁵ Pquiab Mazh rēb Mazh lo me:

—Maestro, pelel nēz na gacndion no, ni per ni zaatne tsie luu ndiond no.

⁶ Dzigo rēbchaa Jesús:

—Naa nac nēz co, naa rseed miech miñe nac diidzli, ni naa rded tib guielmban ndzon ne ib gdzind dze lozh. Lo grēse miech, zha ne gliladz cho nac naa, zha co gdziñ lo Pxoza naa; guien draa stib mod ne gdziñ zho lo me.

⁷ Telne runbey to naa, dzigo runbeyaue to Pxoza naa. Ni runbeylegaa to me, sac tibaque ran to me.

⁸ Dzigo rēbchaa Lip lo me:

—Bzhiguiel mazd blu Pxoza luu lo no. Totsaque dzian no me, lēēlew ga dzigo.

⁹ Pquiab Jesús, rēb me:

—Blactaale dze ga name Lip no naa lo to, ni gardaque ye gunbey luu naa. ¡Grēse zha ne ran naa, lēēque Pxoza naa ga ran zho! ¿Zha nac dzigo ne racladz luu glu naa me lo to?

¹⁰ ¿Niacxe rliladzd luu dzigo ne tibaque nac no grop no Pxoza naa? Grēse miñe rseed naa to, led guicd naa riaba; grēse ncuane run naa, me rnabeya, me runa sac tibaque nac no grop no me.

¹¹ Golliladz sca ne tibaque nac no grop no Pxoza naa. Telne goon rliladzdga tow zigne rnee naa lo to nu, siquier lo grē dziin ne nodziun no, ga golgan ganle ne nli tibaque nac no grop no me.

12 'Ne nligaa, gneli naa lo to ganle: Grëse zha ne rliiladz cho nac naa, ye zho zuñ zho grë milagr ne run naa, ni haxta nroobraa ncuaane gun zho; sac tel naa, laa naa no guia zaatne no Pxoz naa.

13 Ncuaane gnabtaa to lo Pxoz naa, totsaque glu to ne nli rliiladz to naa, zuñ naaw; zeena ga gan miech ganle me nac men ne mazdraa nroob, me nac men ne mazdraa non.

14 Ne nligaa, telne rnalo to naa, ncuaane gnabtaa to zuñ naaw.

Sxeel Jesús Espíritu Sant

15 'Telne nli rleynie to naa, golgun grë mine rn-abey naa to sca.

16 Scagaa naa, laa naa gnab lo Pxoz naa cxeel me tib men ne tibaque gacniën to, tibaque cchoobladz zdoo to; ib gdziñd dze ne csaan me to. ¡Lëe men co ga nac Espíritu Sant, men ne rlu pa miñ nac diidzli; ni ible sxeel Pxoz naa me!

17 Zha ne ngabd xnëz naa, grieelod ycaania zho me, sac rand zho me niicle runbeyd zho me; sangue to, runbey to me sac me quianap to niina, ni zbëzгаа me zdoo to.

18 'Ib csaanladzd naa to, zbire naa guial naa lo to stib.

19 Nli zhilew, zeene gandraa grë miech naa, sangue to gon bii zan to naa; sac zriebaanaa, ni scaquegaa to zgaa to tib guielmban ndzon ne gdziñd dze lozh.

20 Gal dze co, zeene gan to laa naa grieeban, ga gliladz to ganle ne nli tibaque nac no grop no Pxoz naa, zigne tibaque nacie naa to ni naciegaa to naa.

²¹ Zha ne runbey zha nac grë minë rnabey naa, ni rban zhow zigne naca, ga rlu ne nli rleynie zho naa; ni zigne rleynie zho naa, scaque Pxo^z naa zleynie me zho; niicle naagaaw zleynie naa zho, ni zlu naa lo zho ganle cho nac naa.

²² Dzigo pquiab Judas (zhaa Judas Iscariot), rëb Judas lo me:

—¿Pe nac waa lose no glu luu cho nac luu? ¿Telzhe grëraa miech waa?

²³ Pquiab me rëb me:

—Zha ne run minë rnabey naa, lo zha co glu naa cho nac naa; sac rlu zho ne nli rleynie zho naa. Ni haxta ziaad no grop no Pxo^z naa gbannie no zho; sac zigne rleynie zho naa, scaque zleynie me zho.

²⁴ Saⁿgue zha ne rund minë rnabey naa, ¿zha dien glu naa lo zho cho nac naa? Sac rlu rleyⁿied zho naa. Go^lsoladz ganle: grëse diidz ne ron to rne naa, led guicd naa riaba, xtiidz Pxo^z naaw.

²⁵ Laa naa rne grë min rii, laga bii zo naa lo to nu,

²⁶ per zeeⁿe laa Pxo^z naa cxeel Espí^ritu Sant men ne guiaad cchoobladz zdoo to (men co guiaad xcuent naa), men co lozh cseed to, ni gun^csoladz me to grëse minë bne naa lo to.

²⁷ Laa naa guia, per laa naa r^san tib guiel^bley zdoo to, zeena zigne tibliladz rac zdoo naa, scaque tibliladz gac zdoo to. Sac guiel^bley ne rnedz naa lo to nu, nacda zig nac guiel^bley ne runbey grëraa miech guidzliu rii. Tsode to zhgab sca, niicle g^dziebde to.

²⁸ Laa to binle ganle, laa naa no guia lo Pxo^z naa per zbire naa gua^l naa lo to stib. Telⁿe nli rleynie

to naa inē nley golgac, niina ne ron to laa naa guia lo me, sac gon meñ nroobraa nac me lo naa.

²⁹ Laa naa rne grē miñ rii lo to niina, zeena zeene gaca, ga lozh guien to ganle cho nac naa.

³⁰ 'Led nroobdraa sodiidznie naa to, sac ile zi-aad mendox, meñ ne rnabey lo guidzliu rii. Peet grielod gun mendox naa,

³¹ per ible none gon naa xtiidz Pxoza naa meñ ne pxeel naa, zeena gan miech ganle ne nli rleynie naa me. ¡Goltsieso nasca, zeena zio ne!

15

Jesús nac zig tib lbë uv

¹ 'Naa nac zig tib zhan lbë uv, laa to nac zhicwa, laa Pxoza naa nac zig tib zha ne quianapa.

² Grëse zhicw lbë co miñe rquiad nex lo, rchug mew; laa grē miñe rquia nex lo, inē rsanmbe me low, rbelaan me low zeena yquiaraa nex low.

³ 'Zig nac to gon, laa Dios psanmbele to sacne zienal to grē xtidz naa miñe pseed naa to.

⁴ Gbichede to lo naa sca, sinque tibaque golgacnie naa zigne nacnie naa to. Golgan ganle, zig nac tib zhicw lbë uv, peet nex grielod yquia low telne tibnëzle nixa; scaquegaa to nagon, grielod gun to grē ncuaane rdziladz naa, telne nacniede to naa.

⁵ Golsoladz ganle: Naa nac zig nac lbë co, laa to nac zhicwa. Zha ne tibaque gacnie naa, grëse ncuaane gun zho zdziladz Diosa;

⁶ sac tel piche zho lo naa, laa zho nacle zig tib zhicw lbë co miñe nixle tib nëz, laaw nixle ga, ga gbidza; lozh ga laaw tsec.

⁷ Tel_{ne} tibaque gacnie to naa, ni tibaque tsoxco to grē min_e pseed naa to, dzigosi ncuaane gacladz-taa to gol_naba, ni scagaa scaania tow.

⁸ 'Gol_lu sca ne nli xpēēdscuel naa nac to, golsann_{on} Pxo_z naa, niapse ncuaane rdziladz me min_u co gol_gun.

⁹ 'Ne nligaa rleyniedox naa to. Gol_{wi} gan_{le}, zigne rleynie Pxo_z naa naa, scaque rleynie naa to. Gol_guien_n sca tibaque gol_gun min_e rnabey naa.

¹⁰ Sac gon_n, zha ne gon_n min_e rnabey naa, gzataa dze zleynie naa zho; sac sca rleynie Pxo_z naa naa ne run_n naa min_e rnabey me.

¹¹ Laa naa rzet min_u rii lo to, zeena guiaad tib guiel_bley zdoo to. Ne nligaa, zeena guiaad tib guiel_bley nroob zdoo to; ni naa gnedz guiel_bley co lo to.

¹² 'Laa naa rnabey to, laa naa rnab lo to: ¡Gol_leynie samiech to, zigne rleynie naa to! Tel_n naa, gol_guien_n gan_{le} pa lotaa rleynie naa to,

¹³ sac led lega gdeedse tib zha xquiel_mban zho par csilaa zho samiech zho, sinque ga rlu zho gan_{le} pa lotaa rleynie zho zho.

¹⁴ 'Ni to gon_n, tel_{ne} gon to grē min_e rne naa lo to, dzigosi nli rleynie to naa.

¹⁵ Led yedraa niina nac to zig tib ngundziin, sac zha ne nac ngundziin nand zho pe run_n men_n ne rnabey zho. Ne nligaa rleynie naa to, sac grēse min_e rnabey Pxo_z naa, grēse zigne rnee me, laaw bzodiidzle naa lo to.

¹⁶ Gol_guien_n gan_{le}, led tod gon_n bzooblo naa, sinque, ¡naa bzooblo to! Ni laa naa bzooblo to zeena gon_n to niapse ncuaane rdziladz Dios; dzigosi

ncuaane gnabtaa to lo Pxo_z naa, ne nac to zha ne no xnëz naa, zneedz mew.

¹⁷ Laa naa rso diidz lo to: Golleynie samiech to.

¹⁸ Niicle rlëë zho ran zho to, go_lsoladz gan_le, desde naa squi rlëë zho ran zho.

¹⁹ Rlëë zho ran zho to, sac laa naa bleele to lad zho, zienaldraa to ncuaane rleynie zho; laa telne nagon bii nac to zigne nac zho, dzigosi zëëb gleynie zho to.

²⁰ Go_lsoladz gan_le, zeene znu ni naa lo to: ¡Tsod ngundziin ne ndziib_sraa non lo zha ne rnabey zho! Tel naa, p_quianal miech naa, ¿pe lel to dzigo gandze zho? Nana, zigne brie_eequiagaa palal zha ne bliladz xtidz naa, scaque zrie_eequia zha ne y_quiaadiag mi_ne gnee to.

²¹ Tble squianal miech to ne nac to zha ne ngab xnëz naa, sac runbeyd zho Dios men ne pxe_l naa.

²² Tel niaca mi_ne niald naa, niicle ned naa lo zho, zac guiab ne peet xtold zho, sac riend zho pe run zho. Per na gon, guiend pe y_quiaaqui zho; sac bial naa bne naa lo zho.

²³ Zha ne rlëë ran zho naa, yele Pxo_z naa ga rlëënie zho.

²⁴ Ne nligaa telne niaca mi_ne nian_d zho grëtaa milagr nroob ne run naa, zac guiep naa peet xtold zho; per na gon, blactaa milagr ne gon zho ben naa, ni laa zho bii rlëë ran zho no grop no Pxo_z naa.

²⁵ I nagon norieequia mi_ne raquiet lo Xtiidz Dios, zaatne znu rnee: “Peet gui_elntseeb quia_yund naa lo zho, per rlëënie zho naa.”

²⁶ Laa naa nile lo to gan_le, ible sxel naa Espí_ritu Sant gacnie to, niapse diidzli rnee me. Lo Pxo_z naa

grieeme guiaad me, me cchoobladz zdoo to, ni me gneedz guielbiini lo to lozh guien to cho nac naa.

²⁷ Ni scagaa to, ye to laa to none sodiidz lo grëraa miech gacnan zho cho nac naa; sac gon tibaque bzënie to naa desde ne psilo naa xtsin naa.

16

¹ 'Laa naa rne grë min rii lo to zeena peet tsienied guic to, tibaque dib zdoo to gnalo to naa.

² Sac gon zunxoon zho to, zbee zho to yadoo; ni zdzin dze haxta zut zho to, sac masaque sac zho lëe mine racladz Dios ga noyun zho.

³ Laa zho gun grë min co, sac niicle Pxoza naaw, niiclegaa naaw, runbeyd zho no.

⁴ 'Laa naa rzodiidz grë min rii niina, zeena zeene gal dze ne laaw noyac, csoladz to ganle grësew bzodiidzle naaw lo to. Bzodiidzd naaw lo to glo, sacne hor co laa naa bii zo lo to.

⁵ Laa niina nagon laa naa gbiche lo to, laa naa gbire guia lo men ne pxeel naa, per ran naa ni tib to zienied guic gnabdiidz dien pa nac zaatne ga naa, dien pe nacgaa ne laa naa ga.

⁶ Lëe gdib mine run to, riab guielnë to ron to grë mine rne naa nu.

⁷ 'Gneli naa lo to ganle: Mazd wen gon tsie to zeene laa naa guia lo men ne pxeel naa, sac telne cuëz naa nu, grieelod guiaad men ne guidchoobladz zdoo to ga. Sangue telne guia naa, dzigo naazhal cxel me.

⁸ Ni zeene laa me guiaad, me gunquien miech ganle grëse zho zha ngoopdol nac zho, me gunquien zho zha laa zho lo dol co guiaanwen

zho lo Dios, ni guien zho ne nli zdziñ tib dze zeene laa Dios guñ xquielwxtis me.

⁹ ¿Pe nacne nac zho miech ngoopdol? Miech ngoopdol nac zho, sacne riladzd zho cho nac naa.

¹⁰ ¿Zha grieelo laa zho lo dol co guiaanwen zho lo Dios? Zrieelow, mincoxe waa nacne bial naa, ni na laa naa guia zaatne zob Pxoza naa, gandraa to naa.

¹¹ ¿Zha rlu ne nli zun Dios guielwxtis? Nli zun mew, sac gon laa me bnabeyle zha nac grē guielñedox ne ygaa mendox, men ne quianabey lo guidzliu rii.

¹² ¡Nzianraa ncuaane racladz naa sodiidz naa lo to! Per rien naa grieelod tsoguic to zha naca niina.

¹³ Zeene guiaad Espíritu Sant, me gneedz guielbiini lo to guien to grēraa ncuaane no gacnan to, ni grēgaa ncuaane naraa gac. Niapse diidzli gnee me, sac led guicd me guiab grē miñe gnee me, sinque miñe nac xtiidz Pxoza naa, miñ co gnee me.

¹⁴ Ga glu me lo miech ganle ne nli men nroob, men non nac naa.

¹⁵ Rne naa ga glu me, sac grētaa ncuaane rnabey Pxoza naa, yeque naa rnabeya.

¹⁶ Zhilew zeene laa naa gbiche lo to gandraa to naa; per gacdaquew xtse zeene laa to gbiirelaque gan naa stib.

¹⁷⁻¹⁸ Zeene bdzion no sca rnee me, blalaa no psilo no rnabdiidzlsa no rnee no:

—¿Bay zha nacne squi rnee me? ¿Zha nacne rnee me, zhilew dziandraa ne me, per gacdaquew xtse laa ne dzianlaque lo me stib? Ni rneeque me laa me guey lo Pxoza me.

19 Bien me racladz no gnabdiidz no lo me, dzigo nē me lo no:

—¿Racladz to lēē gacnaṅ to zha nacne znu rne naa?

20 Golquiaadiaga sca ganle: Zeēne gdziṅ dze co, laga noyoon to no to guielnē ne laa naa biche lo to, laa grēraa miech haxta zley zho ne laa naa wbiche lo zho. Nli nroob guielnē ne tso to, per zeēne laa to gan naa stib, guielbley nroob ne tso to.

21 Nac cuent rii zig rzac tib meṅ wnaa ne ral xpēēd. Glo yoob ro, yoobdox ne rquia me, per deque laa mēēd co ralse, ni rsoladzdraa me yoob co; sac mazdraa nroob nac guielbley ne rio me raṅ me laa xpēēd me blanso lo guidzliu.

22 Scadaa nagon rzac to, nli mban rac to niina, per zeēne laa to gan naa stib, dzigosi tib guielbley nroob ne tso to, ni choot grieelod ctiche guielbley co lo to.

23 Zeēne gal dze co, yquiindraa to pe gnabdiidz to lo naa. Ncuaane gnabtaa to, lo Pxoz naa gnab tow, ni zneedz mew, sac xnēz naa ngab to.

24 Haxta lo nadze peet gard gnab to, niicle ne xnēz naa ngab to; laa niina laa naa rne lo to ncuaane rquiin to golinaba lo me, ni ible zneedz mew gon. Nroob guielbley ne tso to hor co.

25 Nzian grē ncuaane zine naa lo to, rned naaw clar; per laa dze bdziṅ zeēne grēse ncuaane gne naa, clar gne naaw lo to, zig nac zeēne gzet naa Pxoz naa.

26 Ni zig nile naa ga, hor cosi ncuaane gnabtaa to lo me, zneedz mew, sac xnēz naa ngab to. Yquiindpaa gne naa lo me gneedz me ncuaane gnab to lo me,

²⁷ sac ye me rleynie me to. Rleynie me to, sac gon rleynie to naa ni rliladz to ne nli lo me brie naa bial naa lo guidzliu.

²⁸ Ni nligaa, lo me brie naa bial naa lo guidzliu; ni niina ne laa naa gbi, loque me gdziin naa.

²⁹ Dzigo rdzieets no lo me:

—¡Nasi nagon rien no zha rnee luu! Sac clar rnee luu, rneedraa luu zigne rnee luu glo.

³⁰ Nasi rien no grëse ncuaane nan luu, sac zig nac niina pquiindpaa nabdiidz no lo luu. Gacxe waa, nasi nagon rliladz no ne nli lo Dios brie luu.

³¹ Pquiab me, nē me:

—¡Wen ga telne rliladz to niina cho nac naa!

³² Per lëe hor co nagon bdzin; ni niina, grëse to laa to csaan naa, tib tib to zhaase zhaase nēz ne xen to. Per guiaand naa loxaque naase, sac tibaque nacie Pxoza naa naa.

³³ Grëse ncuaane bne naa lo to nu, laaw bne naa zeena peet tsienied guic to, benque nanle to ganle tibaque nacie naa to. Parga nli, laga no to lo guidzliu rii, nzian grë guielnē ne ted to, per gdziebde to; sac gon naa rnabey, lадznia naa no grētaa ncuaane no lo guidzliu.

17

Rnab Jesús gacnien Dios xpëedscuel me

¹ Blozhse sca nē me lo no, blis lo me bui me nēz gbaa.

—Dios, luu ne nac luu Pxoza naa —rēb me—, niina nagon laa dze co bdzin. Blu ganle men nroob nac naa ne nac naa Xpëed luu, zeena ga glu naa lo miech ganle pa lotaa men nroob nac luu.

² Zigne psan luu grëse miech ladznia naa, ni gdeed naa tib guielmban ndzon ne gdzind dze lozh lo grëse zha ne bneedz luu ngab xnëz naa; scaque niina blu ganle men nroob nac naa.

³ Lëë guielmban co ygaa grëse zha ne gunbey luu, ne nli luuse nac Dios nguia mban, ni guien zho cho nac naa, ne pxeel luu naa bial naa lo guidzliu rii.

⁴ Grëse ncuaane bnabey luu naa, laaw noyun naa; ni ga rlu naa lo grë miech rii ganle pa lotaa men nroob nac luu.

⁵ Scagaa luu ne nac luu Pxoz naa, niina ne laa naa glanso lo luu, blu ganle men nroob nac naa; sac desde mazd glo zeene gard tsa grëtaa ncuaane no, tibaque nac lo guielndzon ne bdzio ne haxta dze ne blanso naa lo guidzliu rii.

⁶ Grëse zha ne ble luu lad grë miech rii bneedz luu lo naa, laa naa pseed zho gunbey zho luu; ni scagaa zha, bliladz zho xtiidz luu. Chen luu zho per laa luu bneedz zho lo naa.

⁷ Zig nac niina, grëse ncuaane bneedz luu lo naa, nanle zho ne luu bneedza,

⁸ sac pseed naa zho grëse wseed ne bneedz luu lo naa, ni bliladz zhow. Wen wen gocnan zho ne lo luu i brie naa zial naa lo guidzliu rii, ni riladz zho ne luu pxeel naa.

⁹ Laa naa rnab lo luu gacniën luu zho. Rnabd naa par grëse miech guidzliu rii, sinque laa naa rnab por grë zha ne bneedz luu lo naa; sac gon chen luu zho,

¹⁰ ni zha glu ganle pa lotaa men nroob nac naa. Grëse zho chen luu zho; sac grëse ncuaane nacchen naa, chen luuw; ni grësegaa ncuaane nacchen luu, chen naaw.

¹¹ Rien naa, led nroobdraa cuëz naa lo guidzliu rii, laa naa gbile guial naa lo luu i; per zha, laa zho guiaanaque nu. Gane niina, luu ne nac luu Pxoz naa, luu ne nac luu tib men ne guiend xtol, laa naa rnab lo luu: pquianap zho ne nac zho zha ne bneedz luu lo naa, zeena ni tib zho nitlod, sinque tibaque gac zho gza zho zigne tibaque nacne grop ne.

¹² Len dze ne blëz naa lo zho nu, zigne racladz luu sca pquianaap naa zho. Ni scagaa ni tib zho bnitlod; zha ne bnitlo ga, nole ne sca nitlo zho, zeena sca grieequia mine raquiet lo Xtiidz luu.

¹³ Zhilew laa naa glanso zaatne no luu i; per len dze ne blëz naa lo zho nu, nzian grë ncuane bne naa lo zho, zeena ye zho tso guielbley nroob ne no naa.

¹⁴ Pseed naa zho mine nac xtiidz luu; per na rlëe grëraa miech ran zho zho, sacne ziena draa zho grë ncuane ndzinlid ne rac lo guidzliu rii. Nac zho zigne nac naa, rleynied naa grë ncuaan co.

¹⁵ Per rnabd naa cuee luu zho lo guidzliu rii, sinque laa naa rnab csaand luu gun zho ncuane racladz mendox.

¹⁶ Sac niicle zhaw, niicle naaw, choot ziona d grë ncuane ndzinlid ne rac lo guidzliu rii.

¹⁷ Bzhiguiel sca bdeed guielbiini lo zho guien zho zha nac Xtiidz luu, sac Xtiidz luu nac diidzli; zeena dib zdoo zho tsoxco zho gban zho zigne rnabey luu.

¹⁸ Sac gon, niina laa naa rxel zho lo grëraa miech guidzliu rii, zigne ne pxeelaque luu naa.

¹⁹ Ni niina, dib zdoo naa laa naa gun mine rnabey luu, zeena ye zho guien zho none dib zdoo zho gun zho mine rnabey luu.

Rnab Jesús por grë zha ne ygabraa xnëz me

²⁰ 'Laa naa rnab gacniën luu zho, ni gacniën luu zha ne naraa gliladz naa, zeenë laa zho tsieseed zho;

²¹ zeenë tibaque gac zho, zigne tibaque nac ne grop ne. Ni scaquegaa gacnie zho ne, zeenë gliladz grëraa miech ganle ne nli luu pxeel naa.

²² Laa naa psannon zho zigne psannonaque luu naa, ni tipse gac zho zigne tibaque nac ne grop ne.

²³ Zigne nacie luu naa, scaque nacie naa zho. Bzhiguiel gocniën zho, tibaque gac zho grëse zho, zeenë gan grëraa miech ganle ne nli luu pxeel naa, ni guien zho ganle zigne rleynie luu naa, scaque tibaque rleynie luu grëse zha ne ngab lo naa.

²⁴ Papá, grëse zha ne bneedz luu lo naa nu, racladz naa ye zho guiaad zaatne glanso naa i, zeenë gan zho lo grëtaa guielndzon ne no naa. Lo guielndzon ne bneedz luu lo naa, sac rleynietaque luu naa haxta zeenë gard tsaa guidzliu.

²⁵ 'Papá, luuse nac men ne rapd ni tib dol, niicle ne runbeyd grë miech rii luu, sangue naa runbey naa luu; ni scaquegaa grë zha ne bneedz luu lo naa nu, nanle zho ne luu pxeel naa.

²⁶ Laa naa pseedle zho gocnan zho cho nac luu ni bii seedragaa naa zho, guien zho ganle pa lotaa rleynie luu naa; zeenë scaque guien zho gleynie zho samiech zho, ni gacnie zho naa.

18

Bnaaz zho Jesús

(Mt. 26:47-58; Mr. 14:43-50, 53-54; Lc. 22:47-54)

¹ Zeene blozh bñab Jesús lo Dios, laa me brieenie no ga bdieedquia no nëz dan ro psë ne rnee zho Psë Cedrón. Ga no tib zaatne zëëb niapse yag nex, dzigo ga bliaaz no gza no me.

² Judas zha ne pto me ga, wen wen runbey Judas lugar co, sac nzian vuelte ziyenie me no ga.

³ Dzigo zeene laa Judas blanso ga, laa Judas blansoniele tib dzoon menquiib, ni zla zha ne rquianap yadoo; no guierbel nia zho blanso zho ga, zha ne nzhen yag, zha ne nzhengaa spad. (Lëë grë zha co pxeel grë pxoz rnabey, ni grë zha farisé.)

⁴ Loxaque blanso zho, laa Jesús brieequiale, rëb me lo zho:

—¿Cho rguib to?

Sca rëb me sac rienle me pe nacne zie zho ga, nanle me pe nac grëtaa ncuane ted me.

⁵ Pquiab zho, rëb zho:

—Men Nazaret ne lë Jesús, men co ziaadguib no. Dzigo rëb me:

—Naa nac men co, tel me ziaadguib to.

⁶ Zeene bin zho rëb me: “Naa nac men co”, wbiire rzhitsaque zho, grëse zho biab liu. Ye Judas no lad co.

⁷ Wbiire Jesús bnabdiidz me lo zho, rëb me:

—¿Cho zho rguib to?

Pquiab zho rëb zho:

—Men Nazaret ne lë Jesús, men co rguib no.

⁸ —Laa naa nile lo to —rëb me—. Naa nac men co. Telne naa ziaadguib to, golsaan sca guey grë zha ne zo lo naa nu.

⁹ Ga brieequia xtiidz me zeene rëb me: “Lo grë zha ne bneedz luu lo naa, ni tib zho bñitlod.”

¹⁰ Laa Simón ney tib spad, hor co bdobaque Simón spad co psilaa me tib niaw, bliengaa me diag derech tib mgui lë Malcw. (Lëë mgui co quia xtsiin meñ ne nac pxoz nroob.)

¹¹ Zeene gon Jesús, rëbchaa me:

—¡Blootsow spad qui Pedr! ¡Bien ganle Pxoz naa rnabey znu teed naa! ¿Niacxe gond naa miñe rnabey me naa dzigo?

¹² Horco laa grë menguiib co, grë zho zha ne rnabey lo zho, ni grë zha ne rquianap yadoo ga, laa zho wbigbe bnaaz zho me. Blozhse bzobdoo zho me, laa zho zienie me.

¹³ Sca nzobdoo me, laa zho bdzinnie me lidz meñ ne lë Anás, pxozdzoop Caifás. Caifás nac pxoz nroob leñ iz co,

¹⁴ ni me ga rëb lo grë meñ non lo zha Israel, ne mazd wena tibaque zha ne ygaa guet, quizh zho par dib guiedz.

Rëb Pedr runbeyd Pedr Jesús

(Mt. 26:69-70; Mr. 14:66-68; Lc. 22:55-57)

¹⁵ Zhiits co, ga nal no grop no Pedr. Ni ne runbey naa Caifás meñ ne nac pxoz nroob ga, zeene bdziñ no ro lidz Anás, loxaque naa brieelo bzëëb nëz ley.

¹⁶ Laa Pedr, zaatne nactaa ro yu par gdziñ zaatne nac ley, gataa biaan Pedr. Nacne brieque naa bnee naa lo wnaa ne zonap ro yu, dzigora bdeed wnaa co diidz bzëëb Pedr.

¹⁷ Dzigo rëbchaa me lo Pedr:

—¿Bod ye luu dzigo lëë nac xpëëdscuel meñ ne bdzinnie zho i?

—Coo, led yed naa —rëb Pedr.

¹⁸ Grë zha ne quia xtsiin meñ co ni grë menguiib ne ndxie ga, laa zho bzëëgle gui. Grëse zho, laa zho

ndxiedzëe lo gui ga, sac rac nal. Ye Pedr bdziñ lo zho ga nodzëe Pedr.

Rquiep Anás Jesús

(Mt. 26:59-66; Mr. 14:55-64; Lc. 22:66-71)

¹⁹ Laa nëz len yu, laa Anás psilo noquiep Jesús dien yo grë xpëedscuel me, ni dien pe nac grë wseed ne nolu me lo miech.

²⁰ Dzigo pquiab Jesús, rëb me:

—Grëse miech, nanwen zho ganle pe nac zhiwseed naa. Sac zeene pseed naa zho, beñd naa ne ngeets zhliaan nseed naa zho; sinque zaatne rcaalsa nzian miech, ga bne naa lo zho. No hor pseed naa zho len grë yadoo win, nogaa hor pseed naa zho len yadoo nroob ne zob lad guiedz nu.

²¹ Nana bod rieguialda ne lo naa rnabdiidz luu. Mazd lo grë zha co ganle bnabdiidz, zha bin grëtaa ncuaane bne naa.

²² Loxaque blozh sca pquiab Jesús, zeene bias tib mennguiib ne rquianap yadoo zo gax ga, bdap me lo Jesús.

—¡Bien ganle! —rëb me—. ¡Led squid gon none yquiab luu lo men ne nac pxoz nroob!

²³ Dzigo rëbchaa Jesús:

—Telne rzac luu beñ naa falt, bnë dien pe nac diidz ne pxin naa. ¿Te wal rdziladz luu ye, rguin luu zha ne rnee diidzli?

²⁴ Blozh ga scaque nzobdoo Jesús pxeel Anás me lo Caifás, men ne nac pxoz nroob.

Rnee Pedr stib runbeyd Pedr Jesús

(Mt. 26:71-75; Mr. 14:69-72; Lc. 22:58-62)

²⁵ Horco laa Pedr bii zodzëeque lo gui nëz ley. Dzigo wbiire zho bnabdiidz zho lo Pedr, rëb zho:

—¿Bod xpëëdscuel meṅ ne blansonie zho i lëë nac luu?

Laane neeli Pedr, leṅ pquiab Pedr rëb Pedr:

—¡Lëda! ¡Zha gaczhe naa xpëëdscuel meṅ qui!

²⁶ Ye tib zhalidz Malcw, zha ne pchug Pedr diag ga, laa zho zodzëë lo gui ga, sac ye zho quia xtsiin pxoz nroob co; dzigo rëbchaa zho:

—Ni gon naa name, ye luu no lad zha ne zonie me leṅ yag oliv ga.

²⁷ Wbiire Pedr rëb Pedr runbeyd Pedr me, ni lëëtaque hor co laa tib gall pcuedz.

Güeynie zho Jesús lo Pilat

(Mt. 27:1-2, 11-14; Mr. 15:1-5; Lc. 23:1-5)

²⁸ Ziadyiinile liuw, zeene laa zho brieenie Jesús lidz Caifás, zienie zho me zaatne nac xyulow Pilat, meṅ ne nac gobernador. Zeene bdziṅ zho, ni tib zho bzëëbd leṅ yulow, sac racladz zho quiits zho miṅe rnabey xley lay zho; parne grieelo yquiin zho guielwagw ne row zho lni Pascw co.

²⁹ Nacne brie Pilat bnabdiidz Pilat lo zho, rëb Pilat:

—¿Pe nacne ziaadnie to meṅ qui nu? ¿Pe rquiaqui to me?

³⁰ Pquiab zho, rëb zho:

—¡Por grëtaa guielntseeb ne noyuṅ me, gane ziaadnie no me! ¡Telne niac me meṅ ndzinli, niacxe lega guiaad-zo no me lo luu!

³¹ Dzigo rëbchaa Pilat:

—Golsënie me, tose golguṅquizh me miṅe been me; zigne nac xley to.

—Racladz no guetgazh me —rëb zho—. Ni nanle luu ganle, no ne nac no meṅ Israel, grieelod ne nose gnabey guet tib miech.

³² Ga briequia miñe bnee Jesús, zeene bzeet me ible zut miech me.

³³ Dzigo bzëeb Pilat len yulow, bnabey me gcredz Jesús. Dzigo bnabdiidz me lo Jesús, rëb me:
—¿Pe nli luu nac zhirey meñ Israel?

³⁴ —Ne squi rnee luu —rëb Jesús—. ¿Pe guic luu biaba, te no cho nëw lo luu ye?

³⁵ Pquiab Pilat, rëb Pilat:

—Nanle luu ganle led zha Israeld naa. ¿Pe nac sca ne ziaadnie zho luu nu? ¿Pe been luu? Sac gon zha ladzaque luu grë zho zha ne rnabey lo zhipxoz zho, zha biaadsan luu nu.

³⁶ Dzigo rëbchaa Jesús:

—Nli rey nac naa, per led lo guidzliu riida, telne niaca miñe lo guidzliu riiw, dzigosi grëse zha ne nacnie naa niactseeb zho, nsaand zho naaz zha Israel naa. Per na, zhaa zaatne nac naa rey.

³⁷ Pquiab Pilat, rëb Pilat:

—¿Rey luu dzigo lëe?

—Scaw gon —rëb Jesús—, nli rey naa; zigne rnee luu i. Ible miñ co nacne bial naa gol naa lo guidzliu rii, ni bial naa bialseed naa miech gunbey zho miñe nac diidzli. Ni zha ne zienal miñe nac diidzli, zha co ngab lo naa.

³⁸ —¿Diidzli ye? —rëb Pilat.

Bnabey Pilat tsiegut zho Jesús

(Mt. 27:15-31; Mr. 15:6-20; Lc. 23:13-25)

Zigne blozh sca rëb Pilat, brie Pilat ga güeynee Pilat lo grë zha ne bdziñnie me ga, rëb Pilat lo zho:

—Ni tib dol gon rapd meñ rii.

³⁹ Per gzobse lni Pascw rii, rnab to rlaa cholze tib zha ne no ladzguib. ¿Pe gnë to sca, mazd csilaa naa meñ ne nac zhirey to nu?

40 Pquiabbe zho, rëb zho:
 —¡Csilaad luu me! ¡Mazd psilaa Barrabás!
 Ni laa Barrabás tib ngbaan nac Barrabás.

19

¹ Zeene gon Pilat sca rac zho, dzigo bnabey Pilat bla men^guiib, bdeed dooguid zho Jesús.

² Bzieecw zho bla lë yag guiets bzoob zho guic me, ni bgacw zho me tib lë lar nizhnie nlaan.

³ Dzigo psilo zho run^guzee zho me, nguiedz roptsie zho rnee zho:

—¡Bley na gan^le, laa luu nacle zhirey zha Israel!
 Ni rgap zho lo me.

⁴ Wbiire Pilat brieequia Pilat zaatne ndxie grë miech co, rëb Pilat lo zho:

—Gol^wi gan^le laa naa cuee me, glu naa me lo to, per gacnanⁿ to gan^le riegua^ld guet me; laa naa pquieple me rlu ni tib guie^lntseeb beend me.

⁵ Zeene laa Jesús brieequia, nzobguicse me coron yag guiets co, ni nacw me lar nizhnie co.

—Gol^wi na gan^le —rëb Pilat—, lëe me nu.

⁶ Grë pxoz ne rnabey, ni grë men^guiib ne rquianap yadoo, zeene gon zho me, psilo zho nguiedz roptsie zho rnee zho:

—¡None guet me! ¡Bnabey yquia me lo cruz!

Dzigo rëb^{ch}aa Pilat:

—¡Gol^tsienie me sca! ¡To gol^quiaa me lo cruz!
 Saⁿgue naa, grieelod yquia naa me lo cruz; sac laa naa gon^le peet guie^lntseeb beend me.

⁷ Pquiab zho rëb zho:

—¡Rdziaap no xley no! Ni ley co rnabey ib none guet me, sac rquidie me rnee me laa me nac Xpëed Dios.

⁸ Zeene bin Pilat sca rëb zho, mazdraa bdzieb me.

⁹ Dzigo bzëebnie me Jesús len yulow stib, bnabdiidz me lo Jesús, rëb me:

—¿Bnë dien cho menpaa nac luu? ¿Pa nac ladz luu?

Per ib pquiabd Jesús lo xtiidz Pilat.

¹⁰ Dzigo rëb Pilat:

—¿Pe nacne rquiabd luu? ¿Gon ganle naa rnabey, zrieelo csilaa naa luu, o gnabeygaa naa yquiaa luu lo cruz?

¹¹ Pquiab Jesús, rëb me:

—Nli luu nac zha rnabey niina, per telne niaca mine needzd Dios guielrnabey qui lo luu, grieelod ne luu gnabey zha gac naa. Mincocxe waa, zhi nac xtol luu, mazdraa nac xtol zha ne biaadlo naa nia luu.

¹² Dzigo gocladz Pilat nsilaa me Jesús, per bzhiguield grë zha ne güeyšan me ga.

—Telne laa luu csilaa mgui qui gon —rëb zho—, rriequia dzigo ye luu rlëenie César. Sac gon, grëse zha ne racladz gac rey, lo César ga racndaan zho.

¹³ Zeene bin Pilat sca rëb grë miech co, bnabey Pilat brieë Jesús nëz ley stib. Dzigo güeysob Pilat lo xcan ne zo ley co, zaatne rzob me run me guielwxtis. (Dipse ley co, niapse quie lag now; gane rnee zha Israela Gabata.)

¹⁴ Lëë dze vispr lni Pascw co ga nagon, zig grolle dzew noyac grë miñ co. Dzigo rëb Pilat lo zho:

—Laa zhirey to nu gon. ¡Golsënie me!

¹⁵ Psilo zho stib, nguiedz roptsie zho, rnee zho:

—¡Beetgagh men qui! ¡Bnabey yquia me lo cruz!

Rëbchaa Pilat:

—Zhirey to nac me, ¿ni racladz to ye gnabey naa yquia me lo cruz?

Pquiabbe grë pxoz ne rnabey rëb zho:

—¡Tibaque meñ ne nac zhirey no, ni lëë meñ co nac César!

¹⁶ Dzigotaa mazd laa Pilat bloo Jesús nia zha ne tsiequiaa me lo cruz.

Pquia Jesús lo cruz

(Mt. 27:32-44; Mr. 15:21-32; Lc. 23:26-43)

¹⁷ Zeene laa Jesús brieë ga, rna tib cruz nroob ney me; laa zho zienie me. Bdzinne zho me ro guiedz, zaatne rnee zho “Gui Beerguic Ngutoo”;

¹⁸ ga pquiaa zho me lo cruz. Ni pquiaa zho schop zha ntseeb, tibga zhicruz zho bzö cue zhicruz me.

¹⁹⁻²⁰ Bnabey Pilat pquia bla lan diidz guic zhicruz me, rneew: “LËË JESUS MEN NAZARET NU, MEN NE NAC ZHIREY ZHA ISRAEL.” Pquiaw xtiidz zha Israel, xtiidz zha Roma ni xtiidz zha Gres. Nzian zha Israel gon sca quia guic zhicruz me, sac gaxpaa ro guiedz nac zaatne pquiaa zho me lo cruz ga.

²¹ Nacne güey grë pxoz rnabey, güeylisqui zhow lo Pilat, rëb zho:

—¿Pe nacne pquiaa luu guic zhicruz mgui co, ne me nac zhirey zha Israel? Pe gacd nquiaa luu: “Rnee me, me nac zhirey zha Israel.”

²² Pquiab Pilat rëb Pilat:

—Mïne pquia naa, laaw pquiale ga. Ni sca none guiaana.

²³ Laa grë menüiib ne pquiaa Jesús lo cruz ga, zeene blozh pquiaa zho me lo cruz, bzhen zho xab me been zhow tap lë, tib lëgaw biaan nie zho tib tib zho. Laa lar ne rbix me, tiblagaque naca, ndiibda;

²⁴ dzigo rëbchaa zho:

—Minritaa nagon dziuungrold ne. Miñe naca gotsaa dzio new rif, dzigo zha ne grieequia zha co guiaañniew.

Ga brieequia miñe raquiet lo Xtiidz Dios, zaatne rnee: “Xab naa, miñe racw naa nzian lë been zhow bgaaza lo zho; laa miñe rbiix naa, bio zhow rif.” Ni scadaa been gza menñuiib co.

²⁵ Gax zaatne zo zhicruz Jesús ga, zo blalaa men wnaa. Ga zo xniaa Jesús, zo tib bel xniaa me, zo Marí tsiel Cleof, ni Marí Magdal.

²⁶ Gaxaque ga zo naa. Zeene gon Jesús xniaa me, ni gon me naa, rëbchaa me lo xniaa me:

—Been cuent nagon lëe xpëed luu i zo i.

²⁷ Laa lo naa në me:

—Been cuent lëe xniaa luu i gon. Bzhiguiel luu gan me.

Dzigo desde dze co, pcaania naa xniaa me bianie naa me lidz naa, pteedlo naa me.

Gut Jesús

(Mt. 27:45-56; Mr. 15:33-41; Lc. 23:44-49)

²⁸ Rienle Jesús ne gataa laa me psiaal dziin ne pxeel pxoz me me gun me, ni par grieequia grëse zigne rzeet lo Xtiidz Dios ted me, hor co bredz me rëb me:

—Rnab zhis naa.

²⁹ Gax lo grë menñuiib ne quianap me ga, ga zo tib cant win no nziu bla. Zeene bin zho sca rëb me, rias tib zho bgadz zho tib lë zhiil lo nziu co, bzoob zhow guic tib goobgui nool güeyquiaa zhow ro me.

³⁰ Zeene bdziñ nziu co ro me, pquiin me niipa, dzigo rëbchaa me:

—Lëew nagon, nataa laaw bza.

Zeene blozh sca bnee me, znuse pquianrun guic me; laa me blozh.

³¹ Guini liu co nac tib dze ne mazdraa nda lo zha Israel. Nacne güey grë zha ne rnabey lo menquiedz güeynee zho lo Pilat, gnabey Pilat tsietiits zho gzhibni Jesús ni zha ne pquiagza me lo cruz ga, zeena quietgazh zho lo cruz dze co; sac racladzd zho scaque quia zho lo cruz zeene laa dze nda co gdzin.

³² Dzigo pxeel Pilat bla menquiib. Zeene bdzin zho, glose güeytiits zho ni tib zha ne quiagza Jesús lo cruz ga; blozh ga, güeytiitsaque zho ni stib zho.

³³ Zeene bdzin zho zaatne zo zhicruz Jesús, gon zho laa me gutle; nacne bdiitsd zho ni me.

³⁴ Horco wbig tib menquiib co, bliz zho xlanz zho ro xcuxti me. Zeene bdoob zho lanz co, nis ne, ren ne brie ga.

³⁵ Naazhal gon znu been zho me. Laaw rne naa lo to zigne gocsew. Golliladza, sac ne nligaa diidzliw.

³⁶ Ga brieequia mine raquiet lo Xtiidz Dios, zaatne rnee: “Ni tib dzit ne no me quiitsd zho.”

³⁷ Ni stib lugar, zaatne rnee: “Bii zanaque zho ganle cho nac men ne bliz lanz zho ga.”

Bgueets Jesús

(Mt. 27:57-61; Mr. 15:42-47; Lc. 23:50-56)

³⁸ Laa José, tib men Arimaté, zeene bin me laa Jesús gutle, dzigo güey me lo Pilat güeynab me diidzbey par grieelo tselit me xcuerp Jesús lo cruz. Ye me xpëedscuel Jesús nac me, per pxobneñd me ne ye me nacgza Jesús; sacne rdzieb me grë men Israel ne rlëe lo Jesús. Dzigo bdeed Pilat diidzbey.

³⁹ Nicodem, men ne güeyzodiidznie Jesús ga tib pcow liu, ye me güeynal zhits José; güeynie me zig galptsiiptap kil tiblo zēnex ne rīaa yaal ne lē mirr ni yaal ne lē áloe.

⁴⁰ Zeene blozh biet Jesús lo cruz, psilo zho bdēēb zho zēnex co xcuerp me; blozh ga, pchel zho me tib lar nquits; sac sca rqueets grē men Israel zhingutoo zho.

⁴¹ Gax zaatne pquia Jesús lo cruz ga, nīaa tib corral no niapse yag nex. Len corral co, ga ndieen tib baa tib cho quie, ni tib ngutoo gard ygueets len baa co;

⁴² dzigo nacne gase güeyqueets zho me, sac zhile runfalt sēēb dze nda co, ni baa cose nac miñe rīaan gax ga.

20

BRIEBAN JESUS

(Mt. 28:1-10; Mr. 16:1-8; Lc. 24:1-12)

¹ Gol dze ne rzobni zhmalā, silgaw, scase bii ncow rnaw, brieē Marí Magdal zie me ro baan Jesús. Zeene bdziñ me, gon me laa quie ne nioog ro baa co bdiooble, laaw zole tib nēz.

² Horco lēēlēd wbire nguzhoon me, biaad me zaatne no no grop no Pedr, biaadnie me diidz lo no, nē me laa zho güeybeele Jesús len baa, dieen palo güeysaan zho me.

³ Dzigo lēēlēd, brieē no grop no Pedr, zioso no ro baa.

⁴⁻⁵ Zeene bdziñ naa ro baa, blēz naa niip, dzigo bdiixlo naa len baa gon naa laa lar ne briel me zhoob ga; per bzēēbd naa. Laa naa blozhdze bdiixlo len baa, zeene laa Pedr blanso.

⁶ Zigne blanso Pedr bzëeb Pedr len̄ baa, gon̄ Pedr nligaa laa lar co zhoob ga,

⁷ niicle lar ne briel̄ guic mew, laaw zhoobaque ga; ndibëdsew, zhooba tib lad.

⁸ Nacne bzëëbaque naa. Zeene gon̄ naa zha zhoob lar co, dzigoraa bliladz naa ne nli brieëban me.

⁹ ¡Sac hor co, bii gard tsoguc naa zha rnee lo Xtiidz Dios; sac ga raquiet ne ible zrieëban me!

Gon̄ Marí Magdal Jesús
(Mr. 16:9-11)

¹⁰ Ye Marí biire blanso ro baa ga stib. Zeene wbii no ga grop no Pedr, laa Marí bii zo ro baa ga.

¹¹ Ga name zo Marí roon me. Sca roon me, tibaque zeene bui me nêz len̄ baa co,

¹² gon̄ me laa chop anjl zob leen̄ co. Dib nquits-biese rna xab grop anjl co, tib me zob nêz ne bzhoob guic Jesús, stib me zob nêz ne bio ni me;

¹³ dzigo rëbchaa me lo Marí:

—¿Pe nacne roon luu?

—Roon naa —rëb Marí—, sac laa zho biadbee xcuerp Jesús nu, na dieen̄ pa güeyšan̄ zho me.

¹⁴ Loxaque blozh sca bnee me, zeene ptsire lo me gon̄ me laa tib men̄ co zo gax zhits me. ¡Per ib been̄beyd me ne Jesús!

¹⁵ —¿Pe nacne roon luu? —rëb Jesús—. ¿Cho rguib luu?

Lel̄ güeynie guic Marí rëb me bod men̄ ne rquianap gaw, dzigo rëbchaa me:

—Bzhiguiel, tel̄ne luu biadbee me nu, bnë dien̄ pa lo güeyšan̄ luu me; zeena ga naa gaxi naa me.

¹⁶ Horco bneelë Jesús Marí, bredz me me. Zeene bin Marí lë me, lëelëd biecw me; dzigoraa beenbey me Jesús.

—¡Maestro! —rëb me—. ¡Mod luu i!

Laa me zie gbig me lo Jesús.

¹⁷ Dzigo rëbchaa Jesús:

—¡Xeeñd luu naa! Sac gard guia naa lo Pxo_z naa gbaa. Miñe naca, güey güeynie diidz lo grë zha ne bzëna_l zhits naa; gudz lo zho: Laa naa nole nëz guia naa lo men ne nac Pxo_z ne, men ne nac Dios ne rdziuunbey ne.

¹⁸ Horco lëelëd wbi Marí ga, ziaadnie me diidz lo no. Blanso me bzodiidz me zha gon me Jesús, ni në me lo no zigne rëbse Jesús lo me ga.

Brieequia Jesús lo xpëëdsuel me

(Mt. 28:16-20; Mr. 16:14-18; Lc. 24:36-49)

¹⁹ Pcow liu dze dmingw co, grëse no ne nac no xpëëdsuel me laa no pcaalsa; loxaque Mazh runfalt. Dziüts nquiaa no yag yu, sac rdzieeb no grë zha Israel ne rlëënie me. Laa no ndxie ga, tibaque zeene brieequia me bzo me glowtaa lo no; pquiaabdiuzh me no.

²⁰ Blozhse pquiaabdiuzh me no, dzigo blu me leñ nia me lo no, zaatne biaaz clav zeene pquia me lo cruz, ni blu me ro xcuxti me. ¡Grëse no per nli rley no zeene bdziön no ne nli mew!

²¹ Blozh ga, në me lo no:

—¡Laa naa rnedz tib guielbley zdoo to, zeena peet tsienied guic to! Zigne pxeel Pxo_z naa naa bial naa, scagaa niina laa naa rxel to.

²² Dzigo blub me lo no grëse no.

—Golcaania Espíritu Sant —në me—.

²³ Ni zeene gon gun to tib miech perdon, scaque Dios zun me zho perdon; laa telne siguield zho gun to zho perdon, laa zho biaanle lo xtol zho ga.

Gon Mazh Jesús

²⁴⁻²⁵ Zeene bdzion no Mazh (Mazh ne rnee zho “Mëédgrop” ga), bzodiidz now lo Mazh, per bliladz Mazha, rnee Mazh:

—Rliladz naa mine rnee to i gon. Zliladz naaw, per haxta ganlo naa me, haxta gan naa len nia me zaatne biaaz clav, ni cteed-xug naa ga; ni csëëbnia naa ro xcuxti me zaatne biaaz lanz ga.

²⁶ Goc xon ngbidza, laa no pcaalsaque len yu co stib; hor cosi yele Mazh ndxiegrë no ga. Scaque dziits nsioog no ro yu, per tibaque zeene bdzion no laa Jesús bzëëb len yu ga stib, bzo me glowtaa lo no, pquiaabdiuzh me no. Blozhse pquiaabdiuzh me no,

²⁷ rëbchaa me lo Mazh:

—Wbig na Mazh, bui len nia naa, psëëb mzhug-nia luu nu. Dieñ nia luu nu, psëëbnia ro xcuxti naa. Gacchopdraa guic luu, sinque bliladz ganle ne nli mban naa.

²⁸ Dzigoraa bliladz Mazh ne nli mban me.

—Nasi rliladz naa mban luu —rëb Mazh—. Luu nac men ne rnabey naa, luu nac xDios naa.

²⁹ Pquiab Jesús rëb me:

—Laa luu rliladz niina, lëëcxe laa luu gonle naa waa. ¡Dichos zha ne gliladz ne nli mban naa, niicle rand zho naa!

¿Pe nacne pquia grë diidz rii?

³⁰ Lo lal ne bzënie Jesús no, ndaldoo milagr ne bdzion no been me, led grëda raquiet lo guits rii.

³¹ Mine pquiase naa nu, laaw pquia naa zeena zeene glab tow, guien to ganle ni gliladz to: Jesús nac men ne biaadsilaa ne lo xtol ne, Dios bzooblo me baaad me, ni Xpëed Dios nac me; sac zha ne dib zdoo gliladz cho nac me, zgaa zho tib guielmban ndzon ne gdziind dze lozh.

21

Gon zho Jesús Galilé

¹ Bded ga, wbiire briequia Jesús lo no stib, zaatne nac ro nisdoo nroob ne rnee zho Tiberias.

² Tib bdze dzew, tipse ndxie no gza no Simón Pedr, Mazh, Natanael (men ne nac men Caná ga), bets naa Jacob ni schop zha ne nacgza no.

³ Tibaque zeene në Pedr, laa Pedr tsie gooz mel. Dzigo rdzieets no:

—Yequ no sca zia guio ne.

Dzigo bziaab no tib len barcw win gza no, laa no zio.

Dipse guieel bdzienie no barcw co lo nis, per ni tib mel bgaad.

⁴ Laa liu ziaadle lozh guini, zeene bdzion no laa tib men co zo ro nis, per ni tib no bdziuunbeyd me.

⁵ Dzigo bnee men co lo no, në me:

—Yo to dien xin, ¿pe bгаа ma?

Pquiab no rdzieets no lo me:

—Choot ma bгаа.

⁶ Dzigo nëchaa me:

—Golron guie ne rgaa ma i nëz derech ganle, znaaz to ma.

Dzigo bron no guie co nëz derech. Zeene laa no cueew lo nis, ib lëbd no glis now; ndaldoo mel ne biodzë lena.

⁷ —¡Pedr! —rep naa—. ¡Bina ganle, xmaistr ne i gon!

Zeene bin Pedra, lëëlëd wbix Pedr xab Pedr, biab Pedr lo nis; psilo Pedr bzhoobnis Pedr brieequia Pedr ro nis.

⁸ Laa no biaan len barcw ga; nole bdziñniew zaatne nac ro nis. Maase tapgaltsii metr sca bdioobniu no guie x co lo nis.

⁹ Zeene brie e no len barcw, bdzion no laa gui noycle, laa tib mel zhooble lo gui co, ye guietxtil ne.

¹⁰ Dzigo në Jesús lo no:

—Goltënie bla mel ne blozh bnaaz to i nu dien.

¹¹ Dzigo güey Pedr biep me len barcw, güeyxadz me guie x ne no mel ga; dzigo bdoobniu mew bdziñnie mew haxta zaatne nacpaa ro nis. Mel tafa, niapse ma mbeew, zeene bgab ma rgaa ma tib gayoo chooptsiptson lo grë ma; niicle scataa nzian ma, per blëb guie x co, briezda.

¹² Blozh ga, bredz me no, në me:

—¡Goltë na, zeena gowxeren to!

Ni tib no bnaabdiidzd lo me dien pe nli mew; sac, jrienpaa no ne nli mew!

¹³ Dzigo wbig me bdiiz me guietxtil co lo no, bzhen me mel ne, bneedz me ma lo no.

¹⁴ Ga bion vuilt brie e quia me lo no wlal ne brie e ban me.

Bzodiidznie Jesús Pedr

¹⁵ Blozhse bdioowxeren no, bredz Jesús Pedr, psilo zho bzë zho grop zho; dzigo rëb me lo Pedr:

—Simón (xingan Jonás), ¿pe nli dzigo rleynieraa luu naa que grë zha qui?

—Nquialadz naa luu —rëb Pedr—, ni nanlegaa luuw ganle.

—Pteedlo grë xpëcwxiil win naa sca —rëb me.

¹⁶ Wbiire me, rëb me lo Pedr:

—Simón (xingan Jonás), ¿pe nlipaa dzigo rleynie luu naa?

—Nquialadz naa luu —rëb Pedr.

Dzigo rëb me:

—Pquianap xpëcwxiil naa sca.

¹⁷ Wbiireque me stib rëb me lo Pedr:

—Simón (xingan Jonás), ¿pe nlipaa nquialadz luu naa?

Zeene bin Pedr sca rëb me, mban goc zdo Pedr; sac gale rac tson vuilt zinabdiidz me lo Pedr, dzigo rëb Pedr:

—Luu nac men ne rnabey, luu nana grësew, nan luu ganle nquialadz naa luu.

Dzigo rëb me:

—Telne nli nquialadz luu naa, yquiaanap luu xpëcwxiil naa sca.

¹⁸ 'Zeene gon bii nguieg luu, led rsoladz luu ganle luuzhal racw xab luu, rrieelo rie luu zaatne racladztaa luu; per zeene gon laa luu gac mengolraa, loxaque nia luu glis luu zhaale zha ne ygacwxab luu, ni zienie zho luu zaatne ni racladz luu.

¹⁹ Zeene znu rëb me lo Pedr, ga bzeet me zha nac guielgut ne yгаа Pedr, ni ga glu Pedr ganle pa lotaa men nroob nac Dios. Blozhse ga, rëbcha me:

—¡Dënal zhits naa!

²⁰ Dzigo nalaque naa zhits me grop me Pedr. Zeene ptsire lo Pedr, gon Pedr laa mëedscuel ne scataa rleynie me ga, laa zho nal ga, zha ne zobpaa

cue me ga lo xtsee co, zha ne wbigpaa bñabdiidz lo me dien cho nac zha ne tsielo me ladznia zha ne gut me; dzigo rëbchaa Pedr lo me:

²¹ —Telzhe zha rii waa, ¿pe nac miñe ted zho?

²² Rëbchaa me:

—¿Pe nadien gun luu ne racladz luu gacnan luuw? Telne gacladz naa, zrieelo gnabey naa gban mgui haxta len dze ne guial naa stib. Led xcuenta luu ga. ¡Na zeen dënal zhits naa!

²³ Zeene gocnan grëraa zha ne rliladz Jesús sca bnee me, grëse zho tibaque güeynie guic zho gdziñdraa dze guet naa. Per led scada, sinque znu naca, rëb me: ¡Pe gun Pedr! Telne gacladz me, zrieelo gnabey me gban naa haxta gal dze ne guiaad me stib.

²⁴ Grëse miñe pquia naa nu gon, grop lo naa gon naaw, grëse zha ne nacgrë no nanpaa zho ganle ne diidzli rne naa.

²⁵ Ndaldooraa grë ncuaane nroob ne been Jesús, tel niaca miñe yquiaw grësew, ni ygaad dib lo guidzliu tsotsow grë guits ne yquiaw ga.

**Diidz ne rdeed guielmban
New Testament in Zapotec, Mixtepec
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

5317ca58-7555-5e4c-a420-e1e9210e2df2